

萬有文庫

第二集七百種

王雲五主編

樊榭山房集

(三)

厲鶚撰

商務印書館發行

樊榭山房集

(三)

厲鶚撰

國學基本叢書

續序

僕詩前集。自甲午至己未。凡二十六年。僅編成八卷。詞二卷附焉。己未至今辛未。十二年來。復次第成績。集如前之數。豈中年以往之作。工于少時邪。自念齒髮已衰。日力可惜。不忍割棄。輒恕而存之。幸生盛際。懶迂多疾。無所託以自見。惟此區區有韻之語。曾繆役心脾。世有不以格調派別繩我者。或位置僕于詩人之末。不識爲僕之桓譚者誰乎。後綴詞一卷。北樂府小令一卷。則年來因詞而及之。雖乏酸甜風味。或不至貽笑僮父面目也。樊榭老民厲鷗。

樊榭山房續集卷第一

詩甲

綸長敬身東扶次韻見和有招予卜居城南之意仍用前韻奉答。

千萬云買鄰。附勢別有見。緬彼南村人。素心皎秋練。吾鄉古城南。取友洵多善。何論天尺五。不隔旬浹面。戴君罷微官。生事尚流轉。長吟肆滂葩。令我欲焚硯。丁君老被褐。元圃懷玉片。文雅終見疵。揚意豈能薦。張君清粹姿。藥樹託深眷。妙語發哀彈。未數空梁燕。殷勤招隱篇。如以乘韋先。東野若移家。借車百事遣。同巷古所敦。誼更重游串。秋燈分讀書。槭槭葉聲晏。

三君招予九日六和塔登高風雨不果仍用前韻奉寄。

昔誦登高文。天隨感所見。何如采黃花。閉戶顏自練。選臺非騎危。趨山若登善。浮圖插江滸。越絕識真面。攀緣夙有約。旋若蟻九轉。擬學岑杜輩。慈恩鬪詩硯。零雨阻游屐。想見青一片。茫茫招海賈。曷月申藻薦。枅栱麗新營。層壁繪天香。當願年穀豐。風濤復清燕。收獲如寇至。忍使屏翳先。坐念班掾言。抑塞不自遣。溼歌待窗明。愁吟炙香串。遐覽分旣違。湫隘甘侶晏。

趙意林添構隱几山樓爲三層賦詩紀事屬予次韻。

經義注上宮。明禮制重屋。樓居自古然。層構擇嘉木。乃有列仙儒。思展千里目。靜稽喻浩經。一過不再讀。般倮恣廳斥。重見四簷撲。俯檻恣窺臨。拔地獻蛾綠。有如駕飛鸞。倒景互奔逐。予生苦卑棲。籬壁常局束。手攬大滌雲。憶昔縱高躅。十年墮塵土。掬水難浣俗。丹梯上更上。碧闌曲復曲。飛翠落襟前。翛然謝五欲。看山不下樓。有酒願頗足。何減南湖主。羣仙誇繪幅。宋張功甫南湖園中有羣仙繪幅樓。靈見江湖諸山。危臺休宜三。名園樂非獨。爲語阮家咸。繼聲寫麗矚。謂令姪誠夫。

東坡先生墨妙亭詩殘刻十七字。石齋黃公得之。琢其背以受墨。名曰斷碑硯。今歸桐溪汪氏。拓其文裝於冊。來索詩。

吳興太守珠湖客。繕亭蒐碑聚名蹟。誰其詩者長帽翁。鉤勒溪藤上樂石。後來烏臺有追勸。蔡奴之兄未。擔撫衆碑零落一碑存。又復缺斷真可惜。誰知此碑爲此硯。世間物化等兒劇。漳浦黃公署名在。箕尾中天映奎壁。文章氣節兩不虧。汪子寶之永無斲。

題汪近人煎茶圖

巢林先生愛梅兼愛茶。啜茶日日寫梅花。要將胸中清苦味。吐作紙上冰霜楹。敲門走送古梅枝。索我煎茶圖子詩。此圖乃是西唐山人所作之橫幅。窠石苔蘚安矮屋。石邊修竹不受厄。合和茶烟上空綠。石兄竹弟玉川居。山屐田衣野態疎。素瓷傳處四三客。盡讓先生七椀餘。先生一目盲似杜子夏。不事王侯恣。

瀟灑尙留一目著花梢。鐵線圈成春染惹。春風過後發茶香。放筆橫眠夢蝶牀。南船北馬喧如沸。肯出城陰舊草堂。

賦詩牌和嶰谷

誰將平水韻刻竹縱橫呈。集韻以爲詩。詩牌所由成。如彼伯玉妻。盤中辨形聲。其難各一字。韓詩六字常語一字難其數逾百名。儀禮百名以上書于策。注名書文也。今謂之字。區分忽陣合。星列俄雲行。束縛窘意匠。凌亂鬪心兵。韓豪不得逞。李捷那可并。諦視經營始。落落疑殘枰。脫簡類酒誥。補亡待由庚。耐險劇登棧。須滿呀填阡。得雋亦偶爾。取鬧真無情。頃之目光到手。敏緣思精。棄取判礪玉。虛實歸權衡。音通柳荝讀。意協猗那賡。澀體篠驂亞。餘韻瘵絮爭。泥塗弄明月。枯枿擢芝英。君家詩神王。筆掉橫海鯨。勺涔出變化。一一敵皆勦。分曹破往例。遞送同踐更。複製詩牌詩。用以堅齊盟。我媿才力薄。壁上觀崢嶸。身世等格五。科第任投瓊。惟此文字戲。見獵心猶傾。和詩傳故事。奚事鍾嶸評。

西顛歸自津門過訪小飲草堂有作

薄薄江雲正護霜。客來踏破徑苔荒。劇談往事同吹網。小喚村醪可過牆。俗眼舉肥愁有例。歸心破臘喜難當。直沽冰雪三年住。釀得詩豪百丈強。吹網出林間錄

十二月十七日夜坐

流光忽忽意騰騰。顧影真如罷講僧。行夜坊隅微有月。潑寒時節竟無冰。向來朋舊空吟卷。閑裏溪山付瘦藤。坐對梅花不成語。十年孤負短檠燈。

同麀徵西顛瑤圃放舟孤山探梅分得低字

先春水波動。碧澈明頗黎。羣山盡倒影。延緣葛嶺西。歲晏競錐刀。甕天亂醯雞。梅花冷笑人。誰踏蒼苔梯。風遏船尾住。日薄林影翳。斜窺冰匳色。漸上寒梢低。亭空撫陳迹。事往多觸攏。同來看花客。半作泉下泥。我輩幸身強。濁酒勿厭攜。吟袖訝染香。醉墨爭題鷺。嚴城自難越。催歸烏擇棲。湖烟晚橫黛。回首境已迷。

除夕南湖草堂作

除夕今番景色饒。輕陰門巷漸微潮。出籬水影梅烟動。隔屋春聲燭燄銷。慈母行年開八秩。太平生世見三朝。野夫不記身名賤。料理杯盤菜甲挑。白樂天詩。行開第八秩。自注。時俗以七十以上爲開第八秩。芥隱筆記。禮。八十日有秩。故以八十爲八秩。

正月三日南湖大雪用東坡先生清虛堂雪韻以下庚申

去冬晴暖草苗沙。青蠅醜扇蜂放衙。天公與物壓疵癘。預儲萬斛空中花。除夕陰陰星斗晦。靛盆樺燭明千家。元化迴旋謹歲始。先驅風伯搖棲鴉。奇寒特地作清瑩。一雪三日何紛葩。樓臺高下若界畫。林薄雜糅誰梳爬。老夫興發叫奇絕。徑往古寺尋僧茶。繞湖躑躅看不足。出郭底須勞馬搗。一峯竹外炯難寫。籤排凍指徒興嗟。不如歸擁地爐坐。內景一氣含朝霞。

人日立春用壬寅年人日雪韻

佳節翩翩故作妍。新詞祝向酒尊邊。釵頭人勝兼春勝。鏡裏今年健去年。大有城南刺船興。行爲江上看花顛。苔痕尙積牆陰雪。且殢重衾一醉眠。

同麴徵敦復。西顛曦亮北亭游。西溪進舟西堰橋。望秦亭法華諸山晴雪。

素色望不窮。連峯出橫約。懿此春霽初。尙果汎雪諾。寒光到天淨。日影穿林薄。巒過首屢回。灘淺舟時閣。憶昔探疎梅。未逢飛翼落。及茲剡中興。凍損萬千萼。去年奇溫梅花盡放。今春爲冰雪所萎。勝事詎易兼。清游聊可託。下春對玉屏。相暖有芳酌。

暮至西溪寫望

緣源遂輟櫂。地冷人事幽。翳竹見雪屋。隔溪倚漁舟。行歌互相答。平衍開閑疇。林壑遠繚白。貫以青瑤流。落日照東塢。悄然思舊游。童稚今始衰。鬢茅不自謀。有媿扶犁子。將事叱春牛。

夜宿溪上巢翫月

臥具寄閑房。溪響無時空。童子香自焚。幽夕起禪諷。門開微月色。潺湲正堪弄。月午山風來。蕭蕭松影動。鳥棲欄戶春。雪護峯腰凍。此時共林僧。忘言亦無夢。

曉入石人塢至粟山下看泉

初日照深竹。微霜溼如煦。東山氣稍和。崑巒此迴阻。石人不可卽。石杵杳何許。太平寰宇記錢唐粟山下有吳大帝石杵題刻尙存

游張氏溪莊是鄒孝直河渚草堂舊址

蕭散悅事外。鼓枻轉回源。偶沿松下援。遂叩花裏門。萬花盡萎香。落粉空苔痕。今晨山雪霽。疎闌坐微暄。藤格穿窈窕。莎徑銷塵煩。水流過北牖。岫列開南軒。昔人隱蒙龍。寂寞道自尊。時預緇素會。偶隨樵牧言。惛然撫遺躅。吹樓匪思存。

晚過秋雪菴

斜景雪峯青。容與來泚中。春田渺無際。碧流漫交通。擁楫忽生寒。峭風吹自東。鱗雲漾天影。落日明復陰。鐘梵此時歇。空香出浦深。香門渡橋入。魚鳥皆相識。更上小樓看。澄心延暝色。欲留苦不得。輕波送客還。村園何限樹。溪口轉多灣。晚契真如理。期水又期山。

信宿溪上巢夜復大雪曉望有作

清寒山夢驚。曉色上佛幌。披衣俯高牖。的皜帶林莽。亂迷荒塗蹤。深窞春流響。稍稍雜霧靄。冥冥失諸嶂。昨來渚上游。復此正中賞。餅盃有妍淨。松竹同偃仰。寥寥觀太空。眩花本無象。一庭虛白光。湛寂生妙想。

雪中西溪歸舟

與盡歸亦好。野艇僅容膝。推篷山趣多。肆目愁易失。雲雪相模糊。粉墨一蕭瑟。橋危積未平。篁深飄更密。中閒五六人。把酒兼散帙。范寬與趙幹。正復難下筆。

題張情田種瓜圖

北垞南鄰路未賒。荷鋤深隱不須誇。鶴飛猶認孫鍾里。飯罷同尋步隲家。十畝青山新戶口。一牀斑管小生涯。畫圖只有長安許。解寫縱橫五色瓜。圖爲許江門筆

紅橋春游曲祝荔亭席上西唐授衣同作

客愁當春亂如絲。挂在紅橋新柳枝。主人官小肯愛客。載酒喚船波拍拍。孟婆跋扈作餘寒。玉簫吹過曲闌干。東陵飛下三青鳥。女兒破顏鈿窩小。繁華瞥眼徒紛紜。牛羊踏穿阿麼墳。隔江山映殘梅晚。招之。不來殊偃蹇。主人勸客爲樂方。陳郎叩舷發老狂。高子哦詩妙五字。游魚出聽燈在水。風花上已連清明。有約更賦麗人行。

杭葦浦編修以詩寄越香次韻奉謝

雲窗風味極深嚴。遠致餘熏妙語兼。詹事可容評甲煎。魯公未許續香籤。春宵几闋勞相憶。微雨房櫳好細添。因有辟寒燕。玉在溫磨肯爲故人拈。

以越香寄樊榭徵君

南湖雪月劇清嚴。特寄名香百和兼。拂去定應縈玉枕。屑殘猶得壓金籛。重衾隔雨微微潤。小榭因風續續添。知有閑情工繾綣。茗娘纖手喜初拈。君侍姬茗人。

四月十九日葑山招同敬身西林集湖舫分得入字

平湖清霽碧無塵。來作遨頭也快人。試挈櫻桃蠻榼小。更烹槐火石泉新。鬢絲似我追今昔。山色如君忘主賓。尙惜三潭涼月好。不教迴櫂采香蓀。

韓晉公五牛圖

藥山攜示書畫二種

一牛胡襍。陰虹屬其頭。隨意斲枯棘。轉瞧不肯休。一牛徐步得自由。彎彎雙角二尺修。考工有語牛戴牛。一牛植立不見尾。黃鍾滿脰鳴聲牟。一牛日高隴上晝耕罷。回顧鶻吐舌欲飲陂塘流。惟有一牛施穿絡。得非王鞅兼裘鞵。觸牆那解成八字。奔馳不息知何求。有唐韓晉公名蹟。今傳留。集賢官畫偶失收。濟南別駕跋尾逾。晉公功業在節鎮。轉輸萬斛江淮舟。爾時助國遏狂寇。首重力穡乃有秋。烏韃白牯禁出境。圖此無異聽田謳。廣桑山中悟夙世。臣節終守繪事優。幕客戴嵩早入室。遺筆不見令人愁。君今百里攜示我。故物知出宋商工。竹垞詩妙珊瑚鉤。我欲躡步非匹儔。但當學取滎陽褚氏相。牛法烟蓑雨笠追逐碌碌村中游。

賈秋壑玉枕蘭亭

元相胡椒八百斛。賈相蘭亭八百匣。權倖雖同嗜好殊。簿錄當時有常法。褚書縮本三摩挲。名以玉枕珍無過。援兵不救呂文煥。武爵翻酬王用和。猶傳石刻風流在。蟋蟀堂空長秋菜。眼見神龍第一匳。與此滄桑閱人代。

宋理宗下嫁周漢國公主于楊鎮。以神龍園亭爲第一。見袁梅清容居士集。

移居四首

南湖結隱八年餘。又向東城賦卜居。頗愛平橋通小市。也多喬木曠清渠。杜陵突兀見此屋。韓子辛勤始有廬。笑我天慵俱未遂。不妨隨地狎耕漁。

華髮蕭蕭漸滿顛。可無清境著閑仙。安排桑苧新茶閣。位置樵青贗釣船。細雨連畦容緩步。涼風動樹足幽眠。麋公祠宇今相並。且逐鄰翁掠社錢。

里有古社。祀蜀漢藥公。子仲。

莎徑梅坪密復斜。百弓堪作小園誇。繞牆細數遲生筍。縛架親扶已臥花。叢雜琴樽臨頓宅。清貧眷屬伏川家。從人畫出村夫子。舊時它事一笑譁。

封軺前日斷知聞。月渚烟林合策勳。仰屋著書聊耳耳。閉門種菜漫云云。驗時巢燕方新乳。迎客昏鴉欲作羣。稍待芟除荒穢了。一軒風景任支分。

爛溪舟中爲吳南圃題賞雨茅屋圖

賞雨古今無。表聖乃其獨。詩品二十四。此語最娛目。瀟瀟感舊襟。點點量愁斛。人言長安道。不及王官谷。

君家吳山陽，亦有香茅屋。清聲觸巖阿，幽籟破林竹。起攜玉壺春，引滿看簷瀑。遠笑自雨亭，天械已潛伏。束書走淮海，圖經事攢錄。故交施田竹，與張南。歸夢對牀卜，一簾清淨水。佳趣難頓復，何如雨美膳。安居果吾腹。華嚴經云：護世城中雨。美膳園浮提雨清淨水。我初營新巢，牽船過堰速。逮此冥濛天，溪上梅子熟。行與君周旋，學舍苦逼。蹙展圖生懽，悅篷背聽撒菽。雲波尙蒼茫，且就鷗邊宿。

甲寅秋杪，有過平望，懷王載揚詩，丙辰同被徵，相見於都下。今年夏五，重會於邗城，僧舍載揚用前韻見贈，再次奉答。

幾年分手輒塵紅，重見江城橫釣篷。賀老清狂尙吳語，杜郎雅麗是唐風。朱門冷炙三生夢，禪榻茶烟一秃翁。爲話舊游姚與鮑，玉裁文學西岡明府玉湖遠隔水雲中。

原作

吳江王藻載揚

幽蘭初吐夕陽紅，喜值吟仙駐短篷。京洛飛塵同昔夢，江湖聽雨見清風。一聲鐵笛東維子，幾闋香詞白石翁。更誦移居新製好，幾時傾倒草堂中。

秋江行

秋陰如墨渲尙輕，秋江如練熨始平。秋風遭之鱗甲生，隔水婉婉秋山橫。秋蛾凝碧怨已盈，秋帆一片破空去。下有秋士與目成，日向天涯飽塵土。何如賞此崢嶸蕭瑟之秋情，君不見秋江行。

七月十七日病起小園作

是日白露
田家忌雨

青林曲渚迴塘。臥起西風竹牀。小雨不妨白露。高雲忽轉殘陽。銷除肺病無暑。曠就心情已涼。正有餘閑弄墨。籬葵浥浥新黃。

白秋海棠

瓊姿不著一分肥。如此幽閑絕世稀。當戶金星開曉靨。下塔涼月曳秋衣。望來甘后風神似。愁到班姬笑語非。只有流螢信孤潔。夜深常傍短叢飛。

偶出

偶出天陰淡。城隅地靜使。涼雲竹枝外。秋水槿花邊。陡覺衣稜薄。回看笠影偏。無人見行跡。幽意若爲傳。

秋爽

古堞連秋爽。迢迢入遠空。年光伏枕後。人事杜門中。桂氣熏殘日。梧聲墜晚風。同時榮落意。吾欲問天公。

南鄰桑屯田。弢甫見訪。兼和移居詩。輒賦五言。用酬雅贖。

窮居蔽泥水。車跡過從稀。避俗翁今是。棲仁里可歸。沈約郊居賦。僑棲仁於東里。牆低聞雉誦。門靜接深衣。自此陶嘉

月。聯吟願莫違。

曉望

徙倚東臯上。微寒欲衣去聲。緜遙山著秋瘦。小沼得風漣。半落鳴機月。連晴曬穀天。病身仍健在。一飽頰豐年。

西林招看菊小飲分得開字

子有東田屋。西風幾度來。看雲穿徑遠。緣水到城迴。紫蟹依方釣。黃花爲客開。醉醒無不可。肯學俗喧囂。
沙河蟹以釣獲之。

九月十三夜月

夜靜樓陰直。蕭寥犬吠闌。江聲喧歲稔。霜信壓秋殘。桃葉經教誦。巴童藥遣丸。無眠五更轉。隙月近人寒。
杭俗以潮大爲有年之兆。

冬日同友人集倬雲禪師方丈

故林初起疾。謝寺復相逢。落葉徧深院。寒雲過斷鐘。淨蔬充一食。鄉思在諸峯。別去經龕閉。安禪禦凜冬。

同西林游水陸寺追和東坡先生韻

笑指東坡宿處村。卅年重打老僧門。詩中修竹還依舊。劫外疎花又返魂。龍攬何年香殿壞。烏啼向夕石幢昏。歲殘真有幽居味。喜得龐居士共論。

鄒筓谷招飲書帶草堂同張南漪作

焚魚卻賦遂初衣。卜築東臯願不違。湖上青山如有約。京華白髮幾人歸。舉杯中散情偏洽。撫足梅公歎亦非。時以足疾得告猶有舊時耕釣伴。遲君西崦筍牙肥。

集小山堂食熊掌作呈谷林

熊肥壓蛙瘦。長吉語難兩。高齋集吟朋。云此自遠餉。駢指含淺臙。舐痕隱其上。廚娘縷切餘。無復攪拏狀。平生所忌者。持付食肴將。芼以筍菌甜。調之用重釀。馨逸魁羹材。箸起未肯放。遐思深山中。是物最神王。傾崕恣咆哮。豐草供跌踢。拗樹有餘怒。孽人定非妄。導氣通仙經。善蟄隱寒嶂。屈伸義或備。肘腋疎周防。是何雞狗輩。碌碌齊得喪。雄姿墮鼎鬲。罷食爲惆悵。

新正五日將赴西林臯亭探梅之約晚晴志喜

以下辛酉

已見雪爲雨。天教五日晴。閑惟覓禪伴。老更勇山程。晚色鈎簾淨。春泥曳履輕。花風吹第一。明發摘船行。

沈家塘舟中望臯亭作

飽聞臯亭幽。梅花若香海。彌年扁舟意。故人肯相待。況多古來迹。出郭興已倍。密竹沈嵒家。長川伯顏壘。蕭散且同羣。興亡渺千載。紛吾愁震柔。旭影一峯在。頃之風襄壽。好事煩眞宰。鳥下翠微明。林開宿雲改。去作詠花人。庶無後時悔。

繇金家堰入臯亭西麓至崇先寺寺爲宋顯仁章太后功德院

石路風輕逗嫩寒。繁花遠近幾千攢。花明正要微陰襯。路轉多從隔竹看。春似合江堪載酒。榻來古寺記迎鑾。誰知當日龍沙恨。不見吹香到地殘。太后北歸曹勛作迎鑾七賦

過橫山飯伏虎禪院

柳栗橫拖去。登臨不用扶。寒香接天影。嵐色上花鬚。饌淨僧分供。庭空客與娛。平生到難處。結習付圓蒲。

入桃花塢。至山半觀龍潭。中有蜥蜴數頭。咸淳臨安志所云水甕也。

中塔院禮真歇禪師塔

靜院無人迹。看碑拜蜀僧。過牆禽動竹。開戶鼠翻藤。寂滅超諸相。安閑得上乘。依然蕉葉塔。誰更續心燈。

訪桐塢安廬爲明慧文法師隱處

不見臯亭慧法師。李先輩長蘅句孤峯幽澗若相期。前身明月今應是。修到梅花定幾時。半百已知逢世拙。十年真悔入山遲。試參金粟堂中影。待我重來照鬢絲。

暮投徧福寺宿楚木禪師方丈

西峯日落東峯昏。游人池邈沿山村。烟中問路得樵叟。青蘿一徑穿頽垣。怪禽啼處明佛火。新月照地如無痕。跳岑左右出林表。參旗井鉞歷可捫。千年廢殿作蔬圃。把茅蓋頂三間存。龐眉長老我舊識。道韻簡

淡顏清溫。草屨峭緊久不用。舌挂屋壁空無言。繩牀留客意頗厚。泉淪性海通真源。睡蛇此夕自遠去。前塵何足勞夢魂。千花玉雪亦可念。生待窗紙烘朝暾。

人日泛舟至龍居灣。遵山徑入永慶禪院。用韋蘇州藍嶺精舍韻。

船子俟前灣。路緣松色上。複嶺始成誤。偶遂登高賞。一公昔經營。流水如在掌。院爲明一濂人所創。層層蒼翠中。梵宇開虛敞。前人舊游處。我輩自來往。門閑花氣深。山空禽語響。遣俗暫徘徊。懷賢成俯仰。李長蘅有宿永慶步月詩。

同鄭筠谷河渚看梅宿鄭雪岬北渚草堂

迢迢小籃輿。直至木橋旁。晴雪一溪影。白雲千嶂香。偶逢谷口隱。如過藍田莊。沿月櫂歌去。梅花夢不忘。

同筠谷太虛上人游花塢諸精舍十首

精進林

敷坐是何處。蒼雪圍青霞。禪心如定水。中滿七淨華。

法楞菴

當年避雨至。白氎寫經寮。門外翠陰合。泉聲飛出橋。

二齋

幽篁不見天。月出影穿漏。照見齋榜題。三點無新舊。

在澗菴

在澗復在阿。香閣橫空起。礪水落天光。時明疎竹底。

憩錫菴

泠泠金策聲。挂在春浮樹。應被樹神留。不復更飛去。

眠雲室

風磴折而上。雲深年復年。佛屋春寒峭。覆以兜羅緜。

樹雪林

澗東清磬發。隨風過澗西。離離覆澗梅。已落開未齊。

谿飲菴

斷苔傍溪居。春來泉脈動。喧寂兩俱忘。風瓢聊可用。

雲巢

經臺烟籜翻。定石風枝掃。一片綠天中。消搖除熱惱。

實相菴

結茅在峯心。杉竹蔽如舫。茶烟去復還。復颺孤藤上。

小圃手植紅梅始花賞以長句

青羊宮路絳霄春。入骨陽和信息真。只合移根從小市。不知何處有雙身。二句皆紅梅事砂丸竹外紛誰擲。丹的風前染乍勻。一點微酸如可托。不辭花下酒杯巡。

筠谷見和移居詩。有聽雨並宜東郭住。看雲各就北窗眠之句。筠谷新宅亦在東城。再用前韻奉贈四首。

燕鴻蹤跡十霜餘。誰道今來慰索居。蒸朮烟深雖隔巷。澆蔬水遠亦同渠。翳塵以外偏離市。廉讓之間穩結廬。何事報章頻往返。不過文史當佃漁。置身曾在閩風顛。得請人稱是散仙。拓地醉鄉新立戶。掀天宦海早回船。忘機鷗似添佳侶。無事雞難喚熟眠。聞道高樓收遠翠。幾曾輕費見山錢。縈紆古堞路橫斜。叩竹輕扶健可誇。舊日掌痕驚夢草。老來腳疾愛尋花。食單不用門生議。步履常過野老家。每坐草堂談娓娓。隔離人在寂無譁。蠻觸紛爭百不聞。陶泓日日共餘勳。玉堂故事歸田錄。委巷叢談灌圃云。慧業君參無上法。衰顏我避少年羣。敢言二老成來往。聽雨聽風或可分。

杏花下感春作

新暖殘寒薄綺櫺。花枝刺眼寂寥中。初來燕子窺妝面。不動參星照小紅。已倩含桃作房老。何須芍藥號崖公。只消春雨江南意。手把霜絲對晚風。

題芮衣亭觀察望雲圖

芮公秉淵粹。吏治飾儒雅。理劇無全牛。撫循去害馬。自從迂上官。未得歸白社。辨銅如令丞。奔走靡九夏。海濱兩黃髮。久缺獻春笋。安輿迎莫致。悵脰意聊寫。望雲與叱馭。知無二心也。

鄰牆杏花和桑叟甫

韓公謫江陵。見花憶京輦。我從學圃餘。種杏遮老眼。一枝頗橫出。風味極嬌軟。卻窺鄰翁牆。暈臉本同產。匹如大小喬。東風嫁各遣。脈脈抱單愁。盈盈欠雙撚。故人過題句。語妙不容選。豪家玉闌空。苔沒爭春楸。美物詎同歸。妄心聊爲翦。小立斜陽裏。詩成一笑筭。來詩有豪家玉闌空。過眼成小劫之句。

二月十三日雨中書事

僻巷無人到。荒溝繞舍分。雨多春半過。雷怒夜深聞。徑草全侵屐。林花亂入雲。誰云作詩苦。終愧織簾勤。

湖上效嬉春體次南礪韻二首

經時未識西湖面。況復勝侶招春遊。行雲不礙梅花嶼。新水初生蘭葉舟。玉局風流那可見。鐵崖故事誰當修。山眉波眼故常在。過卻嬉春也逗留。孤山梅花嶼。明張望湖副使別業也。今酒樓仍其名。

今年好春半風雨。綠勻紅溼。動湖光。聽歌緩緩懷遺俗。屢舞傲傲怒老狂。兩高峯頭人上冢。三天竺國女。焚香更話前朝夜游樂。花上燭龍波底翔。

同家人輩奉老母小飲桃花下作

園林雲霧曉風高。扶掖童孫不覺勞。百葉花宜娛白髮。三升酒易典青袍。上書久謝東方朔。結網深憐北郭騷。惟願年年小寒食。綺霞圍醉坐週遭。

杭郡庠掘地得蘇文忠公表忠觀碑宋刻二片

唐政不綱四海淆。朱三作賊過於巢。鬪雞牧馬盡黃屋。羣雄並起爭咆哮。錢王兩浙爲保障。職貢世守橘。袖包百年運去識真主。自攜圖籍歸汴郊。歐九思公幕下客。何事作史相譏嘲。竊觀私誌簸錢謗。酬以尺喙非啾啾。表忠賴有坡公筆。文如月表楚漢交。大書突兀扶屋極。餘力入石蟠生蛟。誰知楊璉築白塔。塔材菟索填深坳。淮南張氏又折毀。新城摩雲防寇鈔。是時四石僅存二。有人寶惜埋東膠。靈芝荒苑蟲祠字。伐山置棟豁且摩。墨本重摹失遒勁。匹如蹇足追蒲梢。今碑爲明嘉靖中太守陳柯重刻忽驚故物仍出土。園丁奔告鴉髻拋。學官弟子共太息。苔痕橫臥鄰齋庖。千金已免柱下辱。野火幸無牧豎敲。報功復古有位責。移貯祠廡。長箋豈弟君子神所勞。春秋享祀和弦匏。

三月五日小園偶成

三月五日新雨晴。愛向閑園樹底行。不知春水夜來長。但見落花風外輕。紫筍參差看作竹。青梅磊落欲攙櫻。道人坐閱韶光老。懶與塵中歲序爭。

題東坡先生雪浪石盆銘拓本卽用雪浪石詩韻

中山奇石猶雲屯。蘇公筆陣書林尊。回環屬讀有奇趣。如月照壁難霾昏。當年礲材久摧落。雨淋日炙眠沙村。偶然寓意在鄉土。便如雪浪爭夔門。九華明窗未能買。一顰眉綠借銷魂。人間貪著盡幻妄。要須禪喜窮菱根。不見宣和築艮岳。峯巒萬態金填痕。汴園日急取作礲。世事變化安可論。靖康圍城時取艮岳諸石爲礲見三朝北摩挲已似銅狄話。拄杖誰窺玉女盆。如公偉人不可見。只有文字千年存。

嶰谷以曲竹杖見贈

九節仙人杖。鏗然脫贈奇。曲能存直體。瑩可刻新詩。添得閑家具。留爲老護持。塵中不肯用。台宕有前期。

夏日臥疾誠夫惠杏酪一器作此謝之

鵝王乳色白勝酥。仙杏爲漿雅稱無。寒食和餽傳故事。鼎娥候火費工夫。口香三日驚猶在。肺氣兼旬覺頓蘇。珍重攜來情不淺。食經端爲起詩壇。

六月十五夜納涼作

停待江城暑氣清。鐘疎漏斷欲三更。月明不見星河影。夢醒微聞梧竹聲。爽處身疑作寒玉。慵來心未憶

秋繁空簾小院無人到。起看盆荷帶露傾。

立秋日苦熱

閑居節序任推遷。無奈炎歊尚有權。鬢畔一年秋又到。望中六月雨空傳。呼零故事煩官長。病渴心情夢石泉。幸甚發狂非束帶。桐陰赤腳故蕭然。

以香櫞送西林系以長句

不羨龍涎出嶠南。香林作狀補嵇含。橘官淺俗難同調。桂子芳辛許共參。絡斗帳中醒夕夢。供橫幅畔對朝嵐。西風入手微黃處。寫寄新詩海岳菴。

送奕聞計偕北上兼簡令兄董浦

北風吹雁度黃河。南客偏教席帽馱。都講才名吾久識。文場秀句子偏多。聽雞曉榜開蕢燭。走馬春關試杏羅。棣萼故人如問我。正園近日自成科。

歲暮二詠

典衣

青鏡流年始覺衰。今年避債更無臺。可知子敬家中物。新付長生庫裏來。半爲閨人償藥券。時朱姬病甚危不愁老子乏詩材。敝裘無恙還留在。好待春溫臘底回。

借書

歲闌百事不挂眼。惟有借書聊自怡。燈炮風宵親勘處。篝香霜曉手抄時。里中今得小萬卷。東都事略。朱昂篤學。人目

爲小萬卷。謂趙子誠夫。

貧甚我慚無一瓶。舊史臨潢新注就。不知誰肯比松之。時注遼史成。

沈椒園侍御寄和移居詩用韻奉答四首

當年挹袂早春餘。曾訪臯園水竹居。蛭聽歸鴻過別館。閑隨芳草繞通渠。贈予朱老枕中祕。卻返白牛涇

上廬。

癸丑春。晤椒園于杭。以朱性父珊瑚木難爲。既

從此浮蹤忽南北。恭聞尺一起樵漁。

長安秋述欲華顛。回首羣公盡列仙。八月星河虛賣卜。三山風浪枉乘船。修門又是攜書別。東郭堪容抱甕眠。自向鉏瓜問消息。不須籬落望飛錢。

傳來佳句字敲斜。詩室東陽儘意誇。藥樹班行依曉日。茶廳滋味汎輕花。幾人動色觀封事。四韻寒香壓作家。應是本師查長老。令嚴壁壘寂無譁。謂初白先生

書題遼闕念相聞。隔歲方酬子墨勳。臥上下牀豪氣在。住東西屋古人云。謂令兄房仲梅花溪月縈清夢。白鷺

汀舟有故羣。直待許身公事畢。數椽漁舍與君分。君有卜居西溪之意

樊榭山房續集卷第二

詩乙

悼亡姬十二首 井序 以下壬戌

姬人朱氏。烏程人。姿性明秀。生十有七年矣。雍正乙卯。予薄游吳興竹溪。沈徵士幼牧。爲予作緣。以中秋之夕。舟迎於碧浪湖口。同載而歸。予取淨名居士女字之曰月上。姬人鍼管之外。喜近筆硯。影搨書格。略有楷法。從予授唐人絕句二百餘首。背誦皆上口。頗識其意。每當幽憂無俚。命姬人緩聲循諷。未嘗不如吹竹彈絲之悅耳也。余素善病。姬人事予甚謹。辛酉初秋。忽嬰危疾。爲庸醫所誤。沈縣半載。至壬戌正月三日。泊然而化。年僅二十有四。竟無子。悲逝者之不作。傷老境之無怙。爰寫長謠。以摅幽恨。

無端風信到梅邊。誰道蛾眉不復全。雙槩來時人似玉。一匳空去月如烟。第三自比青溪妹。最小相逢白石仙。十二碧闌重倚徧。那堪腸斷數華年。

門外鷗波色染藍。舊家曾記住城南。客游落托思尋藕。生小纏緜學養蠶。失母可憐心耿耿。背人初見髮鬢鬢。而今好事成彈指。猶賸蓮花插戴簪。

悵悵無言臥小窗。又經春雪撲寒釭。定情願兔秋三五。破夢天雞淚一雙。重問楊枝非昔伴。漫歌桃葉不

成腔。妄緣了卻俱如幻。居士前身合姓龐。

東風重哭秀英君。寂寞空房響不聞。梵夾呼名翻滿字。新詩和恨寫迴文。虛將後夜籠鴛被。留得前春簇

蝶。翬猶是踏青湖畔路。殯宮芳草對斜曛。

姬人櫺厝
西湖之南

病來倚枕坐秋宵。聽徹江城漏點遙。薄命已知因藥誤。殘妝不惜帶愁描。悶憑盲女彈詞話。危托尼姁祝

夢妖。幾度氣絲先訣別。淚痕兼雨灑芭蕉。

一場短夢七年過。往事分明觸緒多。擗管自稱詩弟子。散花相伴病維摩。半屏涼影頽低髻。幽徑春風曳

薄羅。今日書堂覓行跡。不禁雙鬢爲伊皤。

零落遺香委暗塵。更參繡佛懺前因。永安錢小空宜子。續命絲長不繫人。再世韋郎嗟已老。重尋杜牧奈

何春。故家姊妹應腸斷。齊向洲前泣白蘋。

郎主年年耐薄游。片帆望盡海西頭。將歸預想迎門笑。欲別俄成滿鏡愁。消渴頻煩供茗椀。怕寒重與理

熏篝。春來憔悴看如此。一臥楓根尙憶不。

何限傷心付阿灰。人間天上兩難猜。形非通替無由覩。淚少方諸寄不來。嫩萼忽聞拚猛雨。春酥忍說化

黃埃。重三下九嬉游處。無復蟾鉤印碧苔。

除夕家筵已暗驚。春醪誰分不同傾。銜悲忍死留三日。愛潔耽香了一生。難忘年華柑尙剖。瞥過石火藥

空擎祇餘陸展星星髮。費盡愁霜染得成。予孳溫柑尚食其半。

約略流光事事同。去年天氣落梅風。思乘荻港扁舟返。肯信妝樓一夕空。吳語似來窗眼裏。楚魂無定雨聲中。此生只有蘭衾夢。其奈春寒夢不通。

舊隱南湖淥水旁。穩雙棲處轉思量。收燈門巷吹微雨。汲井簾櫳泥早涼。故扇也應塵漠漠。遺鈿何在月蒼蒼。當時見慣驚鴻影。纔隔重泉便渺茫。

小園杏花一株。去年頗盛。今春月上亡後。葉發而絕無一花。因用舊韻志感。

乍晴時節舊房櫳。尋徧交枝曲逕中。燕識簾空全不語。花知人去故藏紅。香銷夢斷真憐汝。酒冷燈昏故惱公。爲怕易開還易落。休將怪事怨東風。

清明日過朱姬湖上櫓厝

怕近城南路。扁舟又暫停。落花知別恨。荒草酌幽靈。往蹟六如偈。纏哀百悔經。瑤情兼玉色。爲待拾遺銘。

陳子昂館陶郭公姬薛氏墓志銘云。姬人幼有玉色。發于穠華。聞羸臺有孔雀鳳凰之事。瑤情悅之。

二哀詩

汪青渠

文酒極流連。論交三十年。毀家因任俠。失意託嬋娟。竟傍要離冢。難歸范蠡船。隻雞何日奠。春樹隔吳烟。

余葭白

淮海無雙士。風流見未曾。詩中語盤硬。醉後興飛騰。雪屋貧留客。秋房晚類僧。聞歸襄漢艇。老病失心朋。

雨夜舊房二首

夜半殘春雨。空樓遠響哀。因成合衣寢。夢索寓錢來。感溺通人誚。淒涼宿世該。去年當此夕。正把訴離杯。猶似昔離居。夜雨空帷處。浙浙不同聽。沈沈隔何許。柔鄉謝慧男。退相驚天女。茹恨待平明。殘膏出飢鼠。

午節貧甚。弢甫冒雨以白金十兩假我。賦此奉謝。

風蒲烟篠翳茅堂。著屐誰知水部郎。三日雨來愁不絕。一流銀外義偏長。授經力養分華黍。裹飯深情過子桑。重比木瓜何以報。但將輕薄笑人忙。

題姜學在畫松爲鮑西岡運判作

萊陽姜仲子。矯矯清節後。獨持桑海身。畫松只畫瘦。矮紙氣屈蟠。疎影漏岳竇。勿矜干霄意。乃爲般爾宥。題字不滿幅。筆勢若篆籀。對之神魄驚。慘澹見寒秀。裝堂沒骨花。遠笑荃熙陋。

題西岡小菴園圖十二首

在長興縣署

坐樾軒

密林古城隅。退食風蕭瑟。美蔭願有同。崇情寧自逸。

兼山磴

登山聞古言。徐行則不困。山上復有山。拾級取諸良。

博山臺

林端出延檻。四面皆雲山。遙見夕陽逕。茶人顧渚還。

鑿坏洞

通明肖月窟。只在垣一方。清時非嘉遯。吏隱何相羊。

俊逸亭

秀微詩品惜。奇矯詩評許。君家亭子楣。只署杜陵語。鍾嶸云。鮑明遠才秀人微。故取淹當代。數陶孫云。鮑明遠如飢鷹獨出。奇矯無前。

前度軒

閱人非傳舍。觀我得安居。依舊桃花笑。春風未肯疎。

劉郎泊

軒標前度號。泊用劉郎名。燄水如有意。重來淥更生。

宛宛丘

人語落空波。游儵自環繞。彷彿石魚湖。歷歷坐洲島。

萍牀舟名

小有江湖樂。舟居如屋裏。偃臥看萍星。箇箇生九子。

停橈館

吹笛出菰蒲。延緣思小住。水北望花南。自有留人處。

梯槎

浮槎半臥水。春至葉青青。倒浸明河影。縱橫犯柳星。

木偶峯

水沈旖旎山。十步懷芬馥。試參枯木禪。臭味亦自足。

曉行裏湖作

湖中妙清夏。拂曉破林霏。十里露荷影。四山涼翠圍。監輿度空輦。白袷透風微。過盡西村路。初陽射釣磯。

過集慶寺弔閻妃冢

香門零落水松牌。一種承恩事已乖。猶勝鸞綰燕地去。蓮花國裏葬金釵。

靈隱寺訪巨濤禪師次沈丈樗崖韻二首

不爽西山約。雙旛此竭來。高林行障日。陰洞坐侵苔。地似蜂歌接。禪參鷺子回。千年翠微裏。又涌幾樓臺。

尋呼猿洞

荒塗轉風榛，奇勢出重甌。秋漲礪善崩，石剝去年蘚。梧竹散涼陰，不憚雙足繭。何處問山公，洞深草誰翦。

新菴

小院竹聲合，僧雛進茗時。壁間鎖子挂，閑覓故人詩。泉脈通牀下，竹聲清夜分。子友馬四佩兮，宿新菴句也。

借秋閣

檻俯峯前堆藍曳烟，山靈事古竹密秋先。一坐傾晷重游判年，旁行寫葉聖畫開蓮。閣中有貝葉經一函，明慈聖太后賜九蓮

觀音像一軸。

松靄山房

垂蘿絕壁明晝燈，我來亭午無炎蒸。上方佛面如滿月，平地松影疑層冰。八分門榜百金直。松靄二字扁朱竹垞太史

書八分六時茶板諸天稱，白公有語即吾語。他生願作此山僧。

初秋有感

一室呼童淨掃除，流塵深鎖半年餘。履綦聲已銷閑砌，粉指痕猶印故書。命似涼蟬偏易斷，情如暮雨肯

教疎。驚心振觸傷心候，正是茗姬秋病初。

次前韻

閑情悲思總難除。已是行年半百餘。花上露傷黃子句。石閒字感結之書。風簾舊愛通頭爽。月地今疑入
 夢疎。腸斷曲闌行立處。道妝不見厭禳初。宋黃子思哭愛妾宜哥詩。恩同花上露。留得不多時。見能改齋漫錄。白香山詩。太湖石上鐫三字。十五年前陳結之結之香山
妾桃葉字也。

食鯔魚

一尺銀鯔美。東河亦水鄉。躍時過暑雨。肥處近秋光。收得西施網。調成介象薑。吳船通酒市。風味付廚娘。

題姚敬直西塞山居圖

吳興多勝游。謙之未排纜。山謙之有吳興記。城西西塞山。地僻趣蕭散。失笑經鉏翁。標舉迷町疇。倪文節公經鉏
一帶遠山。為西塞誤。安梅磡詩話。雙明遙睇外。一碧春水緩。參伍峰尖圓。影出葭菼短。至今白鷺飛。桃花忽遮斷。詰兄蓮莊圖。
 我昔題句滿。平遠與此同。妙處欲兩袒。元真凌波去。事往年莫纂。適意貴當前。興發不容懶。雲山韶濩音。
 非君和者罕。會須共扁舟。任世怪疎誕。

答姚玉裁庚申秋日入黃鶴山見懷

十里秋松瀉暗泉。參差游事又三年。著書未遂名山志。纔說幽栖一悵然。

游記曾披畫不如。筍輿香篆路迂徐。與君同有幽栖志。黃鶴山中好著書。

秋曉入西山訪沈丈樗岷於靈隱同游冷泉亭觀水兼呈巨公

秋山雨後風淒淒。山雲開合無端倪。橫衝橋下亂泉發。筍輿徑度尋幽蹊。宣城老人腰腳健。約我茶器相提攜。此時巖樹交冷碧。帝青寶網窺天低。一亭靜觀水石怒。聲聞證果醒塵迷。倒流卷雪那可畫。起誦三峽坡公題。山僧小疾示止觀。櫻糝不下安禪棲。陰沈雨意又復作。欲別未別愁霑泥。安得仙人縮地術。移取潺湲置我西牆西。

和吳敦復題重得先人舊藏宋刻丁卯集後

今人號知書。事簡效頗速。揣摩盈尺編。姓氏春官錄。翩然徂天門。高步嘲宿讀。我友繡谷翁。種學恥徵逐。盡出橐中金。萬卷購連屋。述作資見聞。校勘窮反覆。同心有數子。牽連乃到僕。渠成亦秦利。借寫誇眼福。翦韭論深宵。對榻就家塾。每歎津逮難。散亡思並蓄。翁俄爲飛仙。墓拱十年木。有子能繼之。衣食自節縮。蒐羅及叢殘。更續西齋目。唐吳兢有西齋書目。昨去長安游。閱市淚滿菊。詩題丁卯橋。手澤喜重復。紛紛執綺兒。膏粱果癡腹。諒哉坡公言。如倚几折足。東坡詩世家不可恃如倚折足几。插架本無多。易炊只供鬻。凌雲當一笑。知勿恨雌伏。

中秋夜感舊

疎簾髣髴見明姿。碧浪湖頭月出時。正沈寥天無處覓。最團圓。夜似來遲。鍾陵甲帳淪前譎。魚嶺遺衫斷後期。折得秋花香在手。鬢雲猶記一枝垂。

九月三日曉行西馬塍作

行過馬塍廟。背湖西復西。天清山色近。曉冷葉聲齊。秋水荇川似。荒烟菌閣迷。幽偏詩易得。不盡古今題。
南宋荇川宋伯仁寓居西馬塍有西馬塍元張伯雨有菌閣在西馬塍

重過南湖有感

路近南湖已怕行。舊游無處不傷情。翫梅小院疑前夢。聽雨閑房似隔生。衰鬢照來秋水碧。愁心敲破晚鐘清。空王應念迷家子。一縷天香卽化城。

書沈約宋書後

門外常停貴客車。一生餅鉢托京華。黑衣宰相人間少。著論翻教毀釋迦。

寄題蔡效清竹寒沙碧山莊二首

在武康餘英溪上永安山之麓

攜得琴書住翠微。不關人事爲無機。禽聲似聽前溪曲。雲影堪裁大布衣。生壙預題當樂死。浮家翻笑竟忘歸。竹寒沙碧幽深處。添種梅花雪四圍。

清溪逸士地行仙。抹月批風不記年。愛選好峯撐屋角。別穿流水入階前。少霞字重新銘在。東野居荒古井傳。想見嘯臺高幾許。待將詩句問青天。

抱雲峯并序

敬身得靈壁石。高五寸許。數小峯環峙其下。中窪如壑。最高一峯。上有白脉縈繞。而達於背。髣髴雲氣也。叩之聲清越。良久乃已。予爲名曰抱雲峯。時敬身小疾初起。又得宋高孝兩朝賜楊和王御札墨本。所襯紙是至正間海運册子。皆希代之玩也。好事而具鑒識。往時里中前輩人。無如敬身者。敬身索予詩。乃用元遺山賦武伯英雲巖詩韻以遺之。

幽人病起學鍊顏。江村寒寂鴉影還。帝遣靈文傳十賚。先以泗濱之硯山。似聽松聲吹壑底。森然卻立丁香鬼。洞天一品未足奇。劍倚千尋令公喜。米元章有洞天一品石玉女衣披巫峽雨。胡桃文浹青泥髓。客兒有句寫

幽抱。笑殺巴音歌下里。片帆欲往搜湖嵌。君今繞案浮烟嵐。吳興風篁響清絕。漫費琴絲歛碧巖。趙子昂以絲絃

繫太湖石兩竅。立之齋前。風過有聲如琴。名風篁石。我媿心魂未齋戒。螺子應爲賜湯沐。故家好事譜空青。無此玲瓏袖中物。五代李贇

華有奇石一峰。目曰空青府。閉戶看山道自尊。出岫已嬾如幽人。雲根莫道慳膚寸。望拜三峯禮七眞。

鮑貞女挽詩

地下仍歸妹。人閒免嫁殤。仙娥宗鮑靚。奇節邁共姜。置筵因君舅。勞心撫小郎。休言儘弱女。生氣凜如霜。

湖樓題壁

水落山寒處。盈盈記踏春。朱闌今已朽。何況倚闌人。

種蘆次趙谷林韻

詩人寄興屋三間。移植蘆根爲破顏。底用評花十戶賦。偶然弄水一冬閑。筍抽春味無過淡。葉戰秋聲只守孱。鼓枕便成孤艇夢。梢梢瑟瑟暝忘還。

菽乳和許初觀

巷南有髻許。高情薄侯鯖。袖出菽乳篇。不異月旦評。覩縷衆饌法。語妙朱絲鏗。吾聞古緯書。豆爲靈殖精。漉之麀垢淨。礪之風雨并。囊壓粗滓去。勺攪流膏澄。炊若馬酒熟。凝以鹵汁頰。餘泔滿匱棄。素質盈箱盛。日中咄嗟辦。用佐蔬筍烹。淮南好道術。方士趨虛名。黃金不可鑄。遺誤劉更生。但傳服玉方。千載猶施行。虞伯生豆腐三德贊云。肘後服玉舊有方。瞿曇全其慈。菜蕪益其清。惜哉柱下相。齒落無堅城。當時未噉此。致煩諸嬖嫫。我老滋味薄。杯案焉取贏。才媿東家子。無能發芳聲。泚筆聊繼詠。口福徒營營。

題王麀徵義橋村齋圖四首

攻文惟汲古。羣矣不逢時。屢罷三年舉。翻爲一卷師。書聲穿樹響。人影過橋知。瀟灑吾廬似。斜陽入硯池。閉戶焚香坐。深憑地主賢。課餘看藕蕩。飯飽步秧田。里社碑能作。村齋句必傳。圖中小平遠。風物憶斜川。

蔡邕有庫上里社碑村齋遺事詩金人党懷英作也

小學今多廢。閑居世可逃。蟲魚箋爾雅。草木注離騷。有暇談農事。無人見縑袍。相尋應不遠。河水劣容刀。腹便君自得。影質久相忘。婉婉諸童子。清清此草堂。缸開間字酒。牢臥束脩羊。歲晚歸期近。眉閒色正黃。

津門查蓮坡和子移居詩四首遠寄次韻奉酬

風烟迢遞兩鄉餘。遠道何由接起居。寄訊但憑雙鯉腹。將詩好敵百車渠。宵來半面通清夢。海內詞人問敵廬。強比成都一區宅。那知身擬老爲漁。

神妙秋毫欲到顛。水西莊畔有吟仙。襟題柯古初編集。琴訪成連贖刺船。丁字沾分帆歷亂。角飛城對草

芊眠。討春衝凍相思句。傳唱江南直萬錢。君家水西莊有數帆臺攬翠軒枕谿廊諸勝衝凍每尋孤嶼寺討春時上暗門船來詩句也。

我住城東小徑斜。知君也入昔游誇。當時失把林中臂。幻境如飄席上花。變姓不隨齊范蠡。舊人誰是魯朱家。新來見說耽禪味。手寫楞嚴浣俗譁。

擾擾輪蹄已習聞。達人自著百年勳。飛觴坐上知無數。拜爵田閒不復云。驟雨新荷催度曲。青天明月惜同羣。爲君傾盡金壺汁。他日蠻牋更待分。

谷林和子菽乳詩令子誠夫亦繼作兩篇並示詞義兼妙用前韻爲答二首

通腸僅脫粟。醒酒需佳鯖。美惡舌三寸。過此奚煩評。儒生例說食。金石侑鳴鏗。屑豆與熬豆。經術俱研精。

誰合爲此乳。淋漉原泉并。截肪白未喻。挹漿甘而澄。持餉衛霍室。幾逢薄怒頰。彭亨盜囊腹。詎肯半菽盛。天水賢父子。句法妙煎烹。朋牋遣倅遞。澹泊如自名。野夫久習嬾。著論師養生。榆瞑豆則重。復恐妨游行。愛茲玉液鍊。毛骨資輕清。經年抱愁疾。寒影依江城。調羹憶葱指。零落傷閨嫔。塵滿舊屏障。悼亡詩最羸。往尋鍛磨齋。夢覺香梵聲。一洗綺語債。淨饌先經營。

有梁劉孝儀。食愛具溪鯖。五侯與九伯。七箸供閑評。量腹節所受。年可齊彭鏗。奈何蜀黍祔。不預膳品精。仲殊禪林秀。每令盞糖并。谷神濯垢膩。胷似水月澄。或點菘葉碧。或糝薑芽頰。當其入市初。合併筠籃盛。此族徧燕朔。不止誇南烹。固宜儒者餐。而獨以腐名。雍雍魏三士。踽踽魯兩生。風味與之肖。迂緩難偕行。時乎遇寒凍。乃抱冰棱清。端居喜博物。匡坐擁書城。豆花號腐婢。小圃垂媯嫔。豐年百穀遂。瓦缶縮且贏。流傳勝酥作。唱和如同聲。陸放翁詩新壓黎祁輓勝酥岐亭凜殺戒。刀机無異營。

意林更出新語。和予菽乳詩。伴黃梅花見遺。仍疊前韻爲報。

叩戶送詩急。有如裹芳鯖。一門萃三俊。正用臞翁評。叔也壓強韻。灰裏撥陰鏗。吾觀服食類。以乳名最精。石乳誇丑座。侈與金釵并。茗乳潑南唐。破睡心神澄。若將菽乳比。儉薄應羞頰。不聞郊廟祀。嘉粟先粢盛。已熟豆子雨。何減函牛烹。漢竇實豪宗。同出多異名。明洪武中慈溪時銘季照夢墨藹有寶鷹傳熏胥竟自薦。酒國方全生。或襲鴟夷號。亦冒人銜行。雖非他偏處。終遜玉雪清。君詩獨後勁。偏師欲乘城。媯之蠟花枝。佛妝綴燕嫔。我

亦怯穿縞。敢恃突騎羸。誰言譜蔬食。卻似聞軍聲。鯁花且啜菽。二事堪兼營。宋陳達叟蔬食譜豆腐醬淡羹蔬以五味爲啜菽

冒寒肺疾復作。偶誤食肉。委頓數日。意不如菽乳之佳也。四疊前韻。寄敬身高士索和。

鄒平鍊珍廚。惟數膾與鯖。我輩酸寒句。俗子休嘲評。物小義斯大。春麗兼鯨鯨。食時持五觀。無如菽乳精。往苦徐家肺。不飲疾亦并。得風輒呀呷。晏坐妨幽澄。燒豬偶在御。鼓頰如梨赭。比日廢中食。藥盃琉璃盛。何惜三錢握。買取片玉烹。似擇水中乳。法味難強名。淡成等良友。美疾違傷生。況復詩家景。每工說曉行。釜搖壁燈短。店開山月清。異彼老餅師。有暇唱渭城。執爨霧中花。力作助吳娛。因思售者勞。勝貧匪期贏。力勝賢出論衡而我晚失學。久負荒雞聲。投箸起三歎。媿此空屏營。

十二月十五日。雪中同敬身集谷林南華堂。觀蜀廣政石經殘本。宋廖瑩中世綵堂刻韓集作。

圓林蕭瑟雲模糊。鞞角相與尋清娛。南華堂前好水竹。梅枝橫出爭盤紆。六花高下舞崑岫。似聽蟹爪行。殘蘆頃之灑粉漸照坐。駝裘烏帽主客俱。分茶說餅解寒色。天生一檣重屏圖。凋年似此頗不惡。況觀寶刻開香廚。孟蜀石經僅一卷。張紹文筆巖形模。周南疑誤辨朝字。怒如調飢石本作朝字月令注釋亡哥奴。毛詩禮記俱校書郎張紹文書禮記用唐明皇刪定本秋壑翹材有首選。特築世綵臨西湖。雕鐫韓集稱善本。以月令爲第一李林甫奉敕注。見晁氏讀書志。紙墨精好。久不渝。降王狎客兩寂寞。等爲亡國夫何殊。流傳幸有經籍在。千秋差免諛至愚。武林城中十萬戶。織兒綺榻圍溫爐。雪中那得二游合。冷淡生活笑異趨。詩成喚起鹿門子。任徐今不居東吳。

奉題旌門桑孝子文侯先生抱鐺圖

先生名天顯

君不見陳遺鐺底焦飯母是飴。何如桑孝子父病鐺底煮肉糜。父病噎胃神乾燥食漸不得下。肉糜滑甘。何如羊脂入隘易化。久之疾革欲進羊脂亦不可得。人命一何促。難奪鬼伯手。唯有抱鐺哭。霜氣穿破屋。風聲吼喬木。鐺有耳不聞此。悲哉抱鐺桑孝子。

樊榭山房續集卷第三

詩丙

新正試筆次許初觀韻二首

癸亥以下

春來光景盡依然。少壯心情可似前。漸茁霜髭明鏡裏。自回青眼野鷗邊。絃歌漫欲營三徑。書卷猶應悔十年。留得梅花冰雪後。南鄰北里任熏天。
結習分明著意刪。置身逋客定僧閒。無方醫俗誠堪恨。遇事稱佳亦強顏。鬱壘我纔勞紙墨。醉鄉君且小塵寰。閑中檢校關心處。除卻哦詩不復關。

八日集施北亭齋中

一濯河橋踐宿盟。新年轉見舊交情。詩過人日陰猶在。簾受東風雨易生。魁陸羹材關節物。卷波酒令入春聲。尊殘又送蘋洲別。無數青山逐夜行。
時敦復之湖州

攜姪黼登吳山西爽閣望湖上霽雪

十日鴻雪天乍醒。金鴉展翅光矚矚。春寒留此幻玉在。急攜阿買行伶俜。風扶兩腋上絕磴。墮簷冰柱來殊庭。庭中萼綠華已破。童子輟誦靈飛經。西偏爲我開小戶。翻身跳入申徒餅。全湖只在几席下。峰圍銀

浪搖窗櫺。頗黎盆盛新水滿。中有璇館浮如萍。城陰練練鋪萬瓦。蓋盡塵界濁且腥。林梢陽燄動未動。太素境欲還始青。眼前梨雲尙就夢。畫裏竹葉看揚舲。恐教歸去洞天閉。追摹懽悅忘真形。笑渠序白乏奇語。詩成唱與羣仙聽。

顧丈月田遺羅浮丹竈泥

尋真高步向羅浮。曾向沖虛觀裏游。九轉已成仙歲月。一丸猶帶晉陽秋。虹光幾度崑頭現。赤堦今從掌上留。學取方回封戶法。也堪獨往謝凡儔。

次韻顧丈首春臥病遣懷四首

無奈春寒勁折絲。劇談全似破枯禪。泥乾久積庭陰雪。日薄遲生水際烟。臭味相憐同故疾。心期取次得佳眠。扁舟雙屐須料理。肯把風光讓少年。

熏爐未忍別奇溫。誰識先生冷意存。不用書蒙子公力。何曾裾撇季長門。秦關跋馬峰形壯。粵嶠褰裳海若尊。一笑枕中春夢醒。祇如鴻爪了無痕。

新年準擬暫開顏。有約晴街散瘴頑。老境那能三好具。春光常是二句慳。昔人言一春好天氣不過二十日。茶勳藥福銷除病。選佛期仙占斷閑。拚卻窮陰過買夜。尙留梅月照屏山。

覓句無妨一字貧。蕭然硯北自由身。眼空寓物非留物。齒冷逢人更閱人。雨水已來芳草動。麴塵漸放柳

絲春高車近見多傾覆。不但長途畏獨輪。

落梅二首用二宋落花韻

曲折疎籬亞字牆。春風顛倒月荒涼。吹來笛裏無窮恨。飛墜樓頭第一香。漠漠烟中疑玉面。鱗鱗苔畔即黃腸。綠陰青子差堪念。不道空枝更可傷。

老眼逢春益自傷。花光寫貌最難忘。隨風罷索巡簷笑。著地回思照水妝。幾點鹿胎餘舊跡。一痕獼髓浣殘香。參橫爲乞相思夢。雲影依稀護石房。

和沈房仲論印十二首

白玉摩挲衛青篆。虞家題詠陸家收。姓名偶爾存天壤。騎從何知是列侯。陸友仁有方寸小玉印。文曰衛青。虞伯生詩云。將軍騎從公主

時豈意刻玉爲文章。

葫蘆宮井訪斜曛。官印濃摹宣德軍。閱過土花錢又趙。絕無屈曲少人聞。康熙壬寅。予同吳尺堯。趙功千

畔。老媪家出觀銅印一鈕。縱廣二寸許。小篆文曰宣德軍節度使之印。云。淘井時所得。欲買之。堅不肯。墨

摹其跡。以歸。明年重過。老嫗已亡。印不知流落何地矣。按周顯德六年。從吳越王俶之請。升湖州爲宣德軍。以王弟。僖爲節度使。吾子行云。凡摹印。屈曲盤回。唐始如此。今觀此印。殆不盡然也。

兵象輕將漢印論。誰言好古是雲門。行閒別署軍司馬。狂草淋漓詫醉髡。雲門張紳云。天下皆用漢印。于

載云。永州龍興寺。乃吳軍司馬蒙之故宅。懷素嘗浚井。得軍司馬印。每草書。用此爲誌。

四屨爭誇白石藏。紛紛鍾鼎費評量。好奇更有王都尉。卍字回環吐佛光。姜堯章有白石生四屨印。王晉卿有小印。文曰晉卿珍玩於卍。

字中回環刻之。

珍祕永存虛語耳。明昌七印繼宣和。世閒名蹟俱塵劫。不見袁荆簿錄多。唐王涯有永存珍祕印。金章宗曰羣玉珍祕。三曰明昌珍玩。四曰明昌御覽。五曰御府寶繪。六曰明昌中祕。七曰明昌御府。嚴分宜書畫。

被籍入內府。穆宗時出以充武官世祿。成國公朱希忠以善價得之。後以餉江陵。張敗又遭籍沒。掌庫宜官盜出售之。其入嚴氏時有袁州司籍官半印。入張氏時有荊州司籍官半印。

一自山農鐵畫工。休和紅沫寄方銅。從茲伐盡燈明石。僅了生涯百歲中。王元章始用花乳石刻私印。見圖書印見耶。鑄續霏雪錄。處州燈明石可刻。

故瓦苔皴出未央。曾傳金粟道人章。時時韋帶穿為佩。真樂無如吾竹房。顧阿瑛偶得未央宮故瓦頭。朱有竹素山房。我最懶。懷真樂飛丹霄。數印。印鼻。

小韋帶。嘗在手弄之。欲和其四角。令有古意。

閉關頰酒屬蛾眉。七首夫人擅巧思。不見雉臯雙窈窕。書中有女畫中詩。宋奉華劉妃有閉關頰酒之齋文。曰徐夫人皆以婦人用男子事。徐更巧。合又嘗見冒辟疆姬人金珮。蔡舍合筆畫紅梅玉茗小印。文曰書中有女。畫中有詩。

追仿蟲魚枉用猜。底須獵碣辨纖埃。祇宜規矩斯冰體。好為偏旁正誤來。

何震密疎能結構。文彭精巧更紆餘。許初徐霽歸文休。李流芳風流在善謔。應推孫太初。太白山人孫太

有方唯一者。眇一目而善讀。孫為制一印。唯一每書輒用之。李獻吉戲題其上曰。方唯一目。印制甚曲。信是盲人。罔覺其俗。唯一知而亟毀之。印制乃朱文三字相連。而橫界其中。寓目字也。見徐元懋古今印史。

貴主當年重品題。劫灰瀆洞賸懸黎。皜臣死後良工歇。切玉何人更似泥。子友遺飲谷曾得明樂安長公主小玉印篆刻極精予爲作歌

周傑園侍郎云。自江皜臣死。無復能刻玉者矣。

絕藝吾鄉豈識真。布衣前數顧山臣。城南詩老推能事。肯刻龜螭與貴人。謂丁敬身

同許初觀游城北興福寺

寺爲宋薛左丞昂捨花園地建

新晴無伴與經行。元度能消世外情。鄰叟誰知左丞圃。野僧不避太師名。疎疎綠竹穿空地。澹澹青山見隔城。漫道賢愚同是夢。黨碑千佛至今榮。朱弁曲洧舊聞云。國子監無名氏題元祐黨籍碑曰。千佛名經。

三月三日同許初觀訪魯秋塋山長於敷文書院。卽事有作二首。

萬松難覓昔人栽。勝地天教講席開。嶺上白雲閑不出。湖中空翠遠還來。先生正值成春服。都養猶能治酒杯。醉向層巔問蘭渚。越山如髮隔江隈。

長風不斷送雄談。上巳毋忘此盞簪。詩國芳情花作骨。儒門淡味水回甘。曲江名噪同秋賦。禹穴書奇約晚探。乘輿重來寒食近。十分舊絢看晴嵐。

同少穆竹田敦復南漪飲吳山酒樓。時桃始花。薄暮汎月歸。諸君送予。至西橋別去。

青山繞郭宛游龍。對酒烟光分外濃。春入花枝燒客眼。望窮雲海盪吾胷。懷人袖有三年字。倚健身辭九節筇。歸艇市橋穿月影。一時笑語最從容。時聞西顛將南歸

徐丈紫山沒三年矣聞湖上故居名黃雪山房者已拆賣於人雪樵有詩弔之予亦次韻

逸氣凌霄一劍飛。眼中人物似翁稀。百年無地悲華屋。萬古空山隕少微。春雨如聞吟屐響。夕陽不見釣船歸。門前鴨腳青青在。爲訪遺蹤淚滿衣。

題沈石田蹇驢覓雪圖

兩崖對矗寒空峭。霽色雲端迴相照。瀑冰挂折板橋低。千丈玉龍尾不掉。山腰居人下無路。狐瓜兔逸迷窅窳。疎林敲倒深礪埋。獨凭危闌展孤眺。長耳衝風前爲誰。袖裏鞭梢若垂釣。後者據鞍自呵手。涕凍鼻中強爲笑。乾坤清氣入詩脾。口不能言領其妙。君不見。歇後鄭五作相時。心腸冷落無人知。風雪灞橋驢子上。何如二十四考居台司。又不見。黃山先生句得髓。圭璧絮鹽良可已。詩名世號趙蹇驢。何如頭鴨獻罷吟春水。昔年眯眼輒塵紅。鑿冰不到河伯宮。寒風密雪郭熙畫。張之秋暑銷熾熾。丙辰秋日在長安觀郭熙寒風密雪圖於徐亮直太史席上此圖物色將毋同。眼明今見石田翁。安得人閒五六月。移置覓雪圖當中。我當爲文策拜廬山公。

寒食同少穆初觀城南看花用東坡上巳日攜酒出游韻

熟食例多潑火雨。江吐微雲徧村塢。三點五點欲霑衣。見慣山童不我侮。雨收沙路輒且平。斜上層岡勢交午。林中百舌啾春聲。似與游人相爾汝。遺民那記白雁來。近岫猶看青鳳舞。東風吹返美人魂。楊妹劉

如心獨苦叢叢幻出淡燕支似倚牆頭懷故主微聞流水響佩環邀取新蟾鬪眉嫵意行復入古梵宮礎
斷方花臥黃土西番佛塔滅遺蹤廢井枯棹灌蔬圃黑龍飲器闕金陵真帖蘭亭迷處所木波不見老講
師畫壁烟銷執爐女一十六年追昔游存歿關心首爲俯吳尺袁舒沈欒子已泉下泉下傷春寂無語杭
子宗大上書方待罪丁敬趙功林千棲遲掩衡宇荒祠依舊祈蠶官漠漠輕陰咽簫鼓重來白髮映花紅只有
尊前周與許平生不數蔡克兒送抱推襟兩無阻憑君妙句發天慳歲既晏兮孰華予

次韻顧丈月田以羅浮竹葉符見贈

我生探奇心未暇歷幽竊側聞羅與浮合離冠海嶠劉仙有古壇解種不秋草金人馬天來賦竹句云人天解種不秋草亭亭
挺明玕主人後天老夜吸沆瀣杯揮毫向翠葆淋漓太平符糾繆龍蛇繞至今留靈蹤葉葉出意表蟲鏤
并蝸篆屈曲疊微眇可遇不可求詎屑斂頭鼻閑居窮山經不遺細小晚逢丈人厚詩格倍精好先以
丹竈泥圓如芡堪齧次第贈數翻片碧觀天巧書癡笑識字學媿蟬魚飽何況雲雷文多怪緣見少更聞
玉局翁灑墨亭山曉竹間葉點斑感物豈異道安得手摘之與此爲二寶東坡過瑞昌亭子山題字石壁點墨竹葉上至今環山之竹葉
上皆有墨點出僧道璨柳塘外集願尋絳囊佩同試鹿盧躡虎豹跡俱潛鴻蒙首初掉翺翔雙髻峰名嶽恣搜討問年將
書亥禁飲休犯卯齋心訪隱訣一御籀龍矯再乞安期蒲坐令白髮掃

原作

仁和顧之珽搢玉

羅浮耀南離。巘嶸深且窈。玉乳與金膏。隱現半霞嶠。陽崖產肉芝。陰澗生朱草。遇之一採茹。換骨能不老。可嗟塵世人。入目等蓬葆。常聞十三峯。籠篋萬竿繞。圍徑二十尺。其長蟲雲表。作篋環無端。節目窮。要眇葉大如芭蕉。風來綠裊裊。更有劉仙壇。符竹卻瑣小。高祇數尺強。單複各佼好。一葉兩葉中。篆籀若蟲齧。枯腴自區別。紋畫甚儇巧。余昔展衰步。探歷未曾飽。今以轉贈君。博物理難曉。云可辟不祥。符籙有至道。稚川載登涉。引據按靈寶。抱朴子登涉符引靈寶經以保日義日爲吉日入山宜佩之。舉足任躑躅。精鬼俱遁藏。虎狼皆震掉。留俟五嶽游。幽奇遂徧討。毋須擇天禽。書符以天禽日宜入山不待覓剛卯。諾臯及太陰。祕祝多僞矯。惟有攜此符。諸術盡可掃。

清明後一日魯秋勝招同顧丈月田許初觀看花山中分韻

城南約在許再攀。風磴直上攀頭山。故人喜作此山主。看花不用開門櫃。緣坡蜿蜒得細路。長紅小白爭妖嬈。玉壺臺邊富奇石。一花一石相回環。花梢湖影展曉鏡。諸峰浮渲梳新鬢。風光如此可不飲。酒脯更破先生慳。興酣花下或成夢。夢作胡蝶飛翩翾。我輩幸無世網縛。豪氣豈受名流謾。笑看修竹有彈事。合羨野鷺多清閑。芳時晴景古難得。處處拜埽呈膏環。只愁明日風雨驟。碧翁善幻如黎軒。吳牋襞就字草。醉語請君方便刪。

次日顧丈載酒邀同少穆初觀就飲秋勝於山中同用昌黎山石韻

宿雲岳際光熹微。昨日花好今日飛。初飛幾片花尙好。莫待綠葉枝頭肥。人云虎頭最癡絕。迎繁送謝世所稀。挈壺攜榼到故處。愛花汲汲忘朝飢。空山寂寞二百載。但有弦誦關林扉。天陰勝事在今日。紅蕤素萼吹霏霏。狂歌豪句裂崖石。轟飲一解酸寒圍。酒痕未洗此又浣。莫惜白苧裁春衣。長恨古人不見我。六龍羲御無停鞅。請君試聽陌上曲。斜陽自逐香車歸。

西顛自都下歸里。數日卽有閩中之行。詩以送之。

一尊三載得相同。過嶺輕裝趁曉風。舊雨能來今雨外。歸程并在客程中。舉書好才稱捷。橫槩詩成氣自雄。時客將軍幕府春盡到逢丹荔熟。平安先報海天東。

題周少穆所藏馬和之小景二首。畫上有楊妹子題云。雨洗東坡月色清。市人行罷野人。行莫嫌華礪坡頭路。自愛鏗然曳杖聲。東坡黃州作也。

六飛當日駐錢唐。曾畫毛詩馬侍郎。五百年來遺墨盡。秋林曳杖見吳裝。便娟小楷媚多姿。似見楊家弄筆時。南渡已無文字禁。宮闈也愛寫蘇詩。

諸公詩來兼詠山石。予詩似有未盡。再用前韻賦一首。

畫水最數孫知微。崩灘駭浪勢欲飛。畫石最數畢京兆。深坳淺凸瘦不肥。誰知石亦有水勢。萬松嶺上見者稀。突如灑瀆數間屋。險如盤渦掉蛟飢。軒然大波逼簷際。諦視始覺居巖扉。山中之人以爲玩。飽此朝暉與夕霏。今辰分取更供客。青鞵同闔書城圍。看花酌酒枕石臥。白雲冉冉生我衣。山空畫寂衆禽響。嘲

客徒步無金鞵。金鞵不若徒步穩。醉踏花影敲斜歸。

穀雨前一日同顧丈月田周步穆金壽門丁敬身施竹田吳敦復張南漪泛湖二首

落花片片點衣斑。湖上佳游尙未閑。人影不離春水舫。詩愁都在夕陽山。漁莊款乃烹蓴去。僧院留連試茗還。爲謝垂楊如舊識。白頭慣見舞弓彎。

年時春思盡銷沈。老去湖山興不禁。擬拜東風侯萬戶。誰遮西日價千金。梨花酒熟江城晚。杏子衫輕水寺深。容易隄邊各分背。數峰平遠又成陰。

同作

錢唐吳城敦復

三分春色漸成空。猶有殘花爛漫紅。病酒不嫌新戶減。看山更喜舊游同。雨前槐火催煎茗。扇底香塵暗度風。如此晴湖應見慣。尊前大半白頭翁。

同壽門敬身登寶石山天然圖畫閣予不游此已十四年矣用前韻題壁

山樓孤絕少人登。妙友同凭記昔曾。林氣暖時濛似雨。湖光空裏淡于僧。畫尋白石無殘墨。沈啓南曾寓此榜牘樽寮有瘦藤。湖山勝覽扁張卽之書十四年來筋力減。峰頭直上笑猶能。

桑叟甫水部買得元人百家詩。後有小牋黏陳氏坤維詩。蓋故家才婦以貧鬻書者。惜不知其里居。頗末爾讀之有感。次韻一首。并徵好事者和焉。

姓字深閨豈易知。偶傳紙尾賣書詩。難追寫韻仙家事。應共牽蘿絕代悲。彤管更添高士傳。墨卿別注有情癡。迴腸似共縑繡往。惆悵令人展卷時。

原作

陳坤維

典及琴書事可知。又從案上檢元詩。先人手澤飄零盡。世族生涯落魄悲。此去雞林求易得。他年鄴架借應癡。亦知長別無由見。珍重寒閨伴我時。丁巳又九月九日。廚下乏米。手檢元人百家詩付賣。以供餽粥之費。手不忍釋。因賦一律。賸之。陳氏坤維題。

訊筠谷足疾

杜門計好合。逡巡謝遣庸。醫病未真。宗少文爲臥游客。白居易作坐禪人。香山詩。足輒妨行。便坐禪。樓上花枝遠望春。猶有不妨談笑處。祝君將護長年身。枕邊書卷敲翻午。

足疾臥牀已閱一春。穀雨日。蒙樊榭枉存并慰以佳什。次韻奉和。

錢唐鄭江磯尺

無復澆愁酒數巡。科頭偃臥任天真。讀書未必窺全豹。閱世誰憐號半人。重惜鶯花三月暮。空辜平遠一樓春。勸君努力追懽賞。領略風光現在身。

廣陵同人招集花畦看芍藥四首

三三徑在豔香中。窗戶玲瓏一水通。尚有江南寒意思。留人四月賞芳叢。又是揚州櫻筍時。三年前事費尋思。重來也擬修花譜。不道劉郎鬢有絲。

分畦結屋祀花姑。金翦甘泉雅稱無。爲向惜花人說道。曉來風露不禁扶。

風吹笑語隔簾波。畫舫輕移此處過。我與王郎載同是客。玉杯情重主人多。

漢銅雁足鐙歌爲半槎賦鑿下銘云竟寧元年護爲內者造銅雁足鐙重四斤十二兩護武甯夫

者。

蒲阪首山青透池。黃帝鼎成龍胡垂。戰且學仙事絕奇。茂陵劉郎始祝釐。流傳奕葉敦書詩。猶崇祀典敬雲楣。妍蛾無婢夕侍祠。金釭如虹摻手攜。望靈之來月出時。神光下屬風披帷。翩然而逝不可期。勞心惜兮煎蚌脂。陰精沙麓祚始衰。效祥安得齋房芝。後代蛤彩瑩瓊肌。不照綠綈方底兒。此鐙行第人見之。細數瑤瑟彈冰絲。銘字儼如沙畫錐。內者甯夫掾承令。年是竟甯嗟已竟。制器尙象古示倣。隨陽有序亦天性。銅花涵碧秋水淨。雅勝羊頭與鳳柄。夜涼可親宜放鄭。千年瓠史寄閑評。君家自發短檠詠。

五月二日集小玲瓏山館觀李遵道古木幽篁圖款云至治癸亥十一月廿有五日蘇丘李士行遵道製

溽暑集林亭。軒窗喜埴爽。黯慘尺幅中。風枝互偃仰。此君近醉日。晚筍穿幽壤。因依青銅柯。挺挺絕無黨。要之氣味同。詎作榮枯想。薊丘名家子。畫法不可兩。筆傳金錯刀。格肖珊瑚網。盤根積溜痕。密葉分泉響。題字正癸亥。事與年籥往。駛雨送微涼。偏宜今日賞。

同人攜茗集張漁川齋中試惠山泉用涪翁韻。

吳客遠來好風俱。扁舟載泉兼載書。梅龍貪睡鞭不起。分得數斗纈塘珠。鬪茗須鬪芳而腴。羣賢列坐鐙脚如。嗟予微疾不能飲。湖目但思蓮子湖。子以病戒茗。煎蓮子代之。

同作

臨潼張四科漁川

平泉飲水置驛俱。好事應得牽聯書。瓦罌遺我作茗會。旗槍鬪試湯翻珠。舌本小啜甘露腴。米老稱兄我亦如。當前一任僮父誚。渴吻直欲無江湖。

漢銅龍虎鹿盧鐙歌爲敬身作銘四字曰宜子孫吉

今年曾詠雁足鐙。新詩傳唱滿廣陵。歸來江上訪高士。又見一鐙奇可稱。鐙似舟形本無足。亦非錠中堪

置燭。呂靜韻集無足曰鐙有足曰錠。徐鉉云錠中置燭謂之鐙。偃則爲蓋仰爲盂。孟迺有味中有軸。鹿盧一轉一惆悵。心在兩京千載

上。焚蘭照影復何人。可憐漆炬迎幽壑。孟底鏤文出良手。青瑯素威分左右。後漢書張衡傳左青瑯以雞

也。銘銜三字宜子孫。子孫今日知誰某。廬江李氏昔得一。獨少義文片辭吉。江淹漫歎庶人鐙。充庭豔帳

何堪述。與君莫師無眼禪。頂禮白石蓮花前。燈傳無盡詩無盡。試與佳兒誦此篇。

曲陽孫晴崖明府寄唐北嶽廟李克用題名碑拓本

咸通以後唐運徂。黃家日月誇休符。狂童犯順據帝座。天子下殿奔成都。淮南節度靜如死。滎陽相國憤不蘇。易定將軍哭隨駕。號召大帥行天誅。雁門九郎勇蓋代。義兒奮迅生馬駒。望春宮前蹴踏處。沙飛瓦

震相吞屠都都統論功第一。收城建義應無殊。翠華自此亟返正。王公封賞懸非誣。英雄不殞上源驛。力爲姻舊親援枹。膽落幽鎮兩兇豎。講和解甲歸飛狐。猶恨汴讎未遽滅。矯首東望鬱以紆。是時道出安天廟。同申祈報憑靈巫。誰知光嶽已分裂。惟有正直神所踰。銀鈎鐵畫隴西字。多年風雨龜埋趺。我友牽絲政優暇。命工構屋看重扶。一番拓寄正炎夏。凜凜勁氣生眉須。

秋齋夜宿

新秋未徂暑。夜氣先侵簾。空館心悄然。求夢翻成覺。醒聞竹聲喧。播蕩仍掩斂。祇有故時簾。因風時一颭。次韻敦復秋夜有懷堇浦

秋夜懷人百不宜。憐君去國意遲遲。上書北闕身無補。祖道東門鬢有絲。鶴睡已知更幾轉。蛩吟漸覺歲將移。歸來仍是南村伴。酒醞燈明共賦詩。

題友人讀書圖

人言明山賓。讀書何堪官。君胡讀不輟。豈樂在考槃。不見當路子。百年但笑端。臧穀等亡羊。我自惜跳丸。仲任苦閤市。令狐常借看。況此籤帙富。津逮知非難。是身椰子大。萬卷何處安。憎人異郗公。中有渤海寬。秋夜不寐

蕭然敲枕有餘清。疑是千林訴不平。一室青燈和月暗。滿空涼雨挾潮鳴。心依故處偏多感。秋入衰年最

易驚只恐明朝攬圓鏡。白鬢新見兩三莖。

七月五日滿月精舍同汪旭瞻坐雨用東坡韻二首。

人生違鄉閭。膠擾徇所務。念子歛浦來。寂寞早秋度。相從問字餘。香飯青蔬煮。坐聽窗前竹。雨腳喧萬縷。風驅雲行西。一席天影露。起祝盃底龍。四野待傾注。

雜樹響城隅。蔓草滋城上。此閒夜色幽。想見佛燈亮。既霽行歸休。野水有微漲。緬昔白駒張。畚築事一餉。杭城爲張士信重築東城拓地三里至今曠如郊外閱人寧足計。望古吾何愴。長歌敵秋氣。放士老更放。

西林過滿月精舍

不見幽人久。香林興獨乘。學多先識字。年長欲依僧。竹影掃空壁。蟲聲棲壞塍。秋蟾圓幾夕。靈鷲約同登。

齒痛

齒剛每先折。古語良非虛。病因從口入。致此湖厥初。吾生歷荼苦。嗜甘迺其疎。見飴若養老。得密如癯除。遂令齷齪內。有妖爲安居。鬻似蛀蝨石。動比脆饌車。秋來忽作楚。呻吟廢翻書。五十又過二。早衰惜居諸。世味已飽諳。長此安齟齬。但憂卽漸墮。灑然無復餘。少留了殘齋。丹朱許我歟。龍魚河圖云。齒神名丹朱。

雨中金燈花

盡日淒涼雨。叢花照素秋。碧檠看最瘦。紅豔欲俱流。有淚長門夜。無人小院幽。更憐湖畔路。翠燭冷颼颼。

秋曉同旭瞻湧金門外渡湖至金沙港

山游屢有期。人事每牽縈。昨因林僧約。蓐食興始決。適茲積雨餘。天水共澄澈。宿雲脫諸峯。秋鏡眉影列。我舟戢其中。秀色飽攬攝。俯窺魚乘空。樂意兩無別。環洲渺荷芰。樓臺互明滅。去去最宜人。涼葢鳴不輟。

行春橋道中

石橋橫澗曉。登臨水時逢。洗鉢僧踏破。秋光入松影。不辭路滑訪南能。

游靈隱寺巨公飯予於面壁軒

去年秋雨聲蕭颯。面壁軒中寄禪榻。曉起推窗失四山。白雲正滌神尼壙。今年秋霽風灑然。饁頭重舉舊因緣。隨時喫飯看山坐。不是諸方五味禪。

巨公重建春淙亭於清繞橋詩以落之

高僧能復古。結構樹陰閒。倚檻宜聽水。登橋好看山。魚隨落花出。龍帶晚雲還。只在斯亭下。來春贖占閑。

下天竺寺後尋三生石

秋滿空山草樹平。澤公遺跡此經行。風篁解笑有真意。蒼石能言非俗情。浮世無端傷往事。故人何處話三生。裴回欲問林閒笛。桂子峯頭待月明。

書柘湖張龍威長短句後二首

踪跡江湖燕尾船。一回相見一流連。新詞合付兜娘唱。可惜紅牙久寂然。

樂笑翁今不可回。補題五闕屬清才。薛家鏡子塵昏後。悽絕何人喚夜來。

龍威有和予續樂府補題五闕。其天香賦薛鏡云粉潔休磨。塵

輕不染。識取夜來名。字深有感於予懷也。

董浦歸里。同諸君過報國禪院。池上分得時字。

夕次石門

故人罷官歸。水月同襟期。秋聲了不聞。如僧退院時。坐石鳥下樹。叩檻魚出池。夕陽沒荒城。歸去無人知。

過嘉興

不到禾興郡。於今又八年。尖頭學繡塔。平底載花船。波冷鴨羣語。風高鷺獨拳。只除鬚鬢改。何處不依然。

曉登虎丘別戴綸長

風吹青桂枝。石徑何嫋嫋。言登千人坐。放眼閱清曉。片月尚樓角。初陽已塔杪。香殿上盤旋。飛梁俯幽窅。

兩崖裂秋碧。械劍天影了。直臥古樹深。倒聽墜葉小。地勝忘羈游。心清絕魔嬈。故人此爲別。益我迴腸繞。

遙知陟層巔。雲帆在縹緲。

晚過梁溪有感

九龍之山。山九峯。峯峯晚秀凝雲松。我見青山輒心喜。青山見我如爲容。廿年來往梁溪道。可憐不見青山老。繭紙題詩此際同。竹爐煮茗當時好。三面看山暝色催。舊游零落使人哀。昔年惠山人汪上舍青渠。王吏部蔚林俱已物故。依稀第二泉邊路。半在蒼烟落葉堆。

嶧谷以棲霞僧所送木瓜見贈

昨日繖山山有信。秋黃新摘滿林烟。氣含酸味偏宜客。形借癡名合近禪。一種苞苴足幽事。十分熏習伴無眠。裁詩爲憶明居士。更擬抽帆上寺前。

九日半槎招集行菴以仇英畫淵明像爲供分得歸字

天公惜重九。昨雨今朝暉。出郭有成約。小築傍禪扉。蘭闌一彈指。密林翠四圍。刁調無罷風。將作焜黃飛。撫時共清歡。几榻含幽微。慨然想陶公。妙畫猶依稀。如詩枯而腴。相者空舉肥。采菊薦一卮。願爲公白衣。俯仰千載下。人事多纏微。此中有真意。非公誰與歸。

同授衣廉風游建隆寺用沈傅師游道林嶽麓寺韻在揚州城北。宋太祖征李重進。駐蹕於此。敕建爲寺。

淮南訪古難盡論。出郭坦迤馬可奔。忽聞寺擅大宋號。一林黃葉開祇園。當時李氏此重鎮。雕青天子宅。相尊病龍上升帝。命改戰功猶憶超何樊。樊愛能何徽比肩事主趙檢點。肯爲泥首延朝昏。親征致煩黃屋駕。禪杖更閱七萃屯。殘碑臥地字暗摸。頽垣掘斷無三門。山僧去後佛火滅。餘憤夜照荒燐痕。歐史不書韓

瞠眼。議論誰復能歸根。圭齋別立三臣傳。大快人意。酬滿樽。房陵半仗警眼見。陳橋一詔隨風翻。圓通寮
中祖背字。重圍何術能騰軒。贊甯續傳載云。開寶末。江州圓通寺。且過寮中有莫言幻境等空寂。網常足
以扶黎元。客僧將寂滅。祖背以示其徒。有雕青李重進三字。

樊榭山房續集卷第四

詩丁

同方西疇。閱玉井。陸淳川。自紗帽洲。江行至青山作。

萬頃琉璃一色鋪。天教晴意上殘蘆。乾坤雙眼人將老。風景千年世不殊。建業水從全楚下。佛狸祠近暮山孤。明朝期我蕭齋寺。還有金焦腳力無。子於庚戌晚秋游京口三山已十四年矣。

泊龍潭聯句

渡江已一舍。鷗入港建三叉。樹隱塔突兀。玉井閨華帆轉山餘訝。鷺影過秋水。鷄聲隔蘆花。斜陽半峯色。華

小泊依人家。鷗

宿攝山渡

沿流望繖山。亭亭行艫首。疎雲暮其巔。零落古渡口。清月出復翳。風燈照衰柳。平生江乘夢。三歎未曾有。人語潮生時。雞鳴霜落否。輾轉候天明。披烟偕勝耦。

游攝山棲霞寺留止三宿得詩三首

諸峯圍圓天。青蒼不容罅。廣塗入香門。正殿儼雲架。有懷明徵君。高躅久代謝。山靈收積雨。松風本無價。

東嶺鳥道通。一一嵌精舍。澗泉杖底鳴。苔龕石面亞。遐哉齊帝子。佛事壯堪詫。維時秋冬交。黃葉滿衣下。似曾識前生。肯負雙不借。

初爲棲霞宿。孤月似留客。裴回出東峯。已覺林際白。共坐疎松陰。滿地橫畫格。山深風早寒。諸天去咫尺。倚杖聞微鐘。瘦影寫巖石。默數清境最。迴與下界隔。長嘯猿鳥驚。今夕是何夕。

朝光蔽深竹。陰生西谷西。細路僅一線。旁有百尺谿。岌岌石相倚。其色蒼而黧。歲晏水脈斷。不見下飲霓。高巖蘚蝕字。漫滅二徐題。誰爲噉名者。更鑿青雲梯。取道中峯半。俯視衆岫低。峯腋松雨來。江光忽淒迷。詎敢惜霑溼。明晦態不齊。策勛木上座。絕險相提攜。

攝山雜詠十二首

明徵君碑

唐高宗御撰相王府侍書高正臣奉敕書

居士八辭徵。異代動帝王。侍書筆有神。磊落載天章。商略拓翠墨。用實歸時裝。

舍利壇

隋文遺浮圖。石函瘞雲嶠。下鑄佛涅槃。繪事頓陸肖。奈何完顏軍。缺落付劫燒。

品外泉

引杖試靈源。暗筧通積霽。仰出石蓮花。珍池似阿耨。我來爲品題。清寒不可漱。

千佛嶺

偃松列如幢。層累得殊勝。二分趾外垂。僂僂上危磴。初日照金容。高下眩難定。

翠微菴

霜風放嚴晴。墮葉雨無極。隔離禮磬聲。不改翠微色。揖客登僧樓。轉覺嵐陰逼。

中峯澗

蔓壑一枝水。遠自中峯吐。隔竹鳴佩環。絕憶柳州語。僧房靜夜聞。月來風起處。

試茶亭

言尋白乳泉。臯盧未攜至。不見試茶亭。空留試茶字。猶勝徐十郎。山前設茶肆。

般若臺

精廬黃葉中。閒以修筠裹。般若本非臺。蒲團銷七箇。乞我佛前燈。中宵吉祥臥。

天開巖

絕徑上厓巖。剗削無堅頑。一椽橫鳥下。南宗著色山。高空指飛鳥。遠自蔣陵還。

白鹿泉

泉上有明李言恭篆書三字。

澄泓浸山腹。天影露半珪。傳聞初開日。雪色飲伊尼。誰知臨淮侯。興與桑苧齊。

靳尙祠

楚臣佩葦蒹。林表曾現形。自受度師戒。不食江魚腥。我非離憂客。坦步半山亭。

白雲菴

林深老屋斜。日落山風大。一僧拾橡歸。延客聽虛籟。爲憶曾游人。迢迢白雲外。謂嶼谷牛查兩君

留別棲霞寺久林禪師

幽尋不惜路岐遙。冷淡家風久寂寥。洞上禪燈今再續。山中浴鼓早相招。髮分艾色知同歲。手指松根話

六朝。別後茫茫隔烟水。寄書何處附歸樵。師與予同王申生

次韻樊榭居士山中留別

釋界清久林

白雲紅葉隔城遙。日掩禪關臥寂寥。苔逕偶因高士埽。幽人不待野僧招。欣登峻嶺參千佛。笑看蒼松問六朝。此去金陵多勝蹟。新詩惠我寄山樵。

自棲霞至金陵道中。有梁始興王憺。安成王秀。吳平忠侯景墓。石麒麟墓。碑猶存。蔣王廟在鍾山之麓。太平門外城下。卽後湖也。得四絕句。

巢鳥送客又飛還。霜樹參差古路閒。偷得定林詩裏景。蹇驢滿意看鍾山。
梁朝遺跡未銷磨。運去王侯可若何。突兀田閒牛礪角。閱人誰似石麟多。

顰顰吟鞍拜蔣王。雲旗髣髴護重岡。不教廟額仍稱帝。豈爲流聞望子香。
薄日殘雲黯欲晡。避人漁艇占枯蒲。城根斷續明流水。不問心知是後湖。

登清涼寺

寺爲李後主避暑宮

石城山上寺。云是李王宮。路折三休至。江橫萬里通。吳帆如鳥白。楚樹入雲紅。竟日同吟眺。秋衣不耐風。

秦淮懷古四首

佳麗江山入暮秋。秦淮從古擅風流。殘陽半隔烏衣巷。綠水斜通白鷺洲。事去興平空拜爵。天亡歸命不成侯。當年大有傷時語。一曲清歌在漏舟。

回首中原接戰塵。但誇天塹渡無因。阿誰肯墮新亭淚。有客猶尋舊院春。會冠蓮臺王學士。名喧桃葉顧夫人。蛾眉前後皆奇絕。莫怪羣公欠致身。

南都近事鬪妍華。北里妝成勝若耶。妙妓新葶吟蛺蝶。君王特敕問蝦蟆。匆匆時節爭鉤黨。草草兵戈散內家。贏得渡頭殘柳在。瘦腰無力倚風斜。

女牆東畔足流連。只少劉郎好句傳。長板橋空餘舊月。回光寺古賸寒烟。荒畦盡種瓢兒菜。樂府新停燕子箋。聞道樵童閑換酒。井中淘得墜金鈿。

宿長干寺僧房

閑房晏坐處。幽絕到何曾。小飢因耽靜。清談嬾對僧。香焚石上月。壇禮樹間燈。此地秋堪餞。吟成秋卷稜。

歸舟江行望燕子磯作

石勢渾如掠水飛。漁罾絕壁挂清暉。俯江亭上何人坐。看我扁舟望翠微。

洪熙古刺水歌同全謝山作

銅鑪上刻云洪熙元年熬造古刺水一鑪淨重八兩鑪重三觔

哀牢九隆漢所開。唐代六詔爭喧騰。玉斧畫河段氏立。阿蓋殉節梁王摧。濠梁真人設郡縣。炎徼西南俱

革面。分司古刺始羈縻。

永樂四年大古刺土酋潑地那浪入貢立宣慰司又立小古刺長官司

貢琛莽怕旋來見。

洪熙元年底馬撒宣慰司署古刺司妹塔跌倒莽怕

入。取寶船回恤遠夷。萬方輻輳仁宗時。此香不滅芬陀味。此水應超蘇合池。甲煎百和花盈缶。六一泥封

篝火後。斑衣染麝鑱耳。曾珠絡挈餅馬郎婦。熬成細字鐫青銅。進入春風生六宮。一灑羅衣長不滅。氤氳

願與君恩終。可憐債帥如香尉。購得朱門媚權貴。分宜遺臭塞兩儀。當時壓倒龍涎氣。

籍沒嚴氏有洪熙宣德古刺水十三

罐。枕頂餘芳世廟修。御衣小炷純皇留。南都譜記春橋願。助戚方傳恭順侯。華胥舊事無人識。流落江南

并江北。金仙鉛淚一函中。夢破香銷彈不得。

浮山禹廟觀山海經塑像三十韻

淮海皆平壤。隆然片石支。中央居混沌。明德鎮阡危。不共羅山合。還同息壤遺。媪神唐日觀。江水漢家祠。永永尊文命。湯湯罷怨咨。徽形猶帶瘦。高棟反如卑。柏翳承虛寢。狂章侍玉墀。風雲生恍惚。土木出恢奇。

憶昔鴻荒遠。靈安婦子熙。神姦渾不辨。人獸互相欺。枯步窮乾奧。方祇駭地維。蛇操何蝸螻。鼈抃更隳隤。林出刑天舞。巖藏貳負尸。應龍飛有翼。精衛溺堪悲。博物推中壘。傳芭望少姨。兒坪終古詫。母石至今垂。經可百蟲證。功堪四載追。解裳噉適裸。鑄鼎訝逢魑。定括河圖象。徒聞太史疑。規摹非近事。指點立多時。六月當初降。千村走禱祈。笙鏞應閒作。巫覡尙謳思。瓜蔓前年決。魚頭萬室爲。空紆謁者策。屢費大農資。呵壁吾將問。攀菱且補痍。牙鬚雄此輩。祕怪孰攸司。落照明低塔。寒飈響女陴。惠之前有塑。靖節後無詩。沃野居難卜。丹丘到未遲。如聽赤緜使。歷歷話幽姿。

集方環山齋題明窻獻王畫

寒齋延明曦。壁訝數峯接。其下松檜陰。鬪水穿石摺。巖屏中有人。停琴展幽牒。侍立雙玉童。衫袖空翠裊。我疑盧鴻一期仙。磴可躡。諦觀出窻藩。珍重墨林笈。高皇十七子。龍種何蹀躞。晚年慕沖舉。自抑金川捷。倖非七國敗。思與八公揖。此圖寓意耳。深羅神隱愜。渾如匡廬雲。尙襲草堂頰。太息南昌城。空宮填落葉。

金陵移梅歌爲嶰谷半查賦

小玲瓏山館隙地。高高下下多種梅。主人性癖愛奇古。更令遠訪江之隈。蔣陵氣暖首靈谷。花匠家多住鳳臺。根蟠數世仍護撥。萼點十月先含胚。殷勤揀取六七本。乘濤東下將春回。江神豈是妬花者。魚龍鼓鬣揚其頰。封姨拗怒得無恙。園丁上番工移栽。南枝記取解束縛。凡卉見之皆輿僮。清泉百道足生意。微

陽潛伏扶新菱。西疇居士稱好事。行廚招客銜深杯。酒闌客起寒月上。疎影一一堪疑猜。挨石鬚鬢鎖水怪。循牆屈曲藏凍虺。預想他時雪滿眼。彷彿此際香橫苔。不須健步煩杜老。芳心更用狂吟催。

冬日同人游廣陵北郊作

出郭少塵事。短晷殊清嘉。輕冰犯孤艇。敗柳何鬢髻。捨之度蜀岡。一徑縈修蛇。環溪有小築。宛似甫里家。不放能言鴨。但種凌風花。新春飽香稻。餘力窮幽遐。偕行陶謝手。畫意看盤車。人影殘陽裏。輾轉誰能遮。紆回堡城曲。高下新塘窪。往者李鐵槍。於此紛攫拏。臨安運未畢。紅襖歸泥沙。晚入鐵佛寺。竹間見餘霞。老僧指廢殿。猶以楊吳誇。英雄三十六。寂寞盤昏鴉。何況墟墓間。陳人去如麻。茫茫識誰氏。既朽同浮莖。吾儕稱達者。野飲興倍加。吟作隨意詩。醉墨風中斜。

十一月十三日廣陵紀事戲答諸同人作二首

豈是風懷尙未衰。鬢絲禪榻已心灰。恐教人種年來失。又遣香車客裏催。名士肯分閑館貯。謂辦谷半查詞流

許借聘錢來。謂恬齋西疇南圻漁川居然添得詩家事。不比金釵二十枚。用南史周盤龍事

廿年書劔兩無成。贏得江淮作達名。盛德何傷笑安石。閑情不礙賦淵明。占香夢驗消寒夜。爲客心酬舊

雨聲。歸到故園春正早。玉梅花暎綺窗橫。緯略引夢書云。夢得香物。婦人歸也。

邗溟一道到江迴。遺構何年亦壯哉。越國已將藏甲賀。晉人曾見好冠來。祭餘稻蟹猶風俗。夢斷梧桐有劫灰。枕璞早知從直諫。中原牛耳得追陪。

題汪旭瞻蘆溪書隱圖

以下甲子

汪子有書癖。長懷萬古情。與人殊嗜好。無地著功名。老屋碧蘆繞。故溪春水平。青燈耿遙夜。鄉夢畫中生。試燈前一日。同人集趙谷林小山堂。觀流求國官工松元泰新刻墨譜。用山谷松扇韻。

疎梅刺簷蠹撲紙。澗澗春杯歲相似。酒半娛賓更絕奇。一帙歡斯副墨子。佛帳煤新翠餅寒。是中望若三神山。我疑徐市逸書本。只在東溟支島間。流求去日本甚近。故用歐公日本刀詩意。

元夕雨中集吳敦復餅花齋分得何字

佳節恩恩僂指過。故人有約共婆娑。杯中酒勸迂辛似。席上詩如小庾何。唐人有上元夜效小庾體詩。聽雨簾櫳燈影颯。衝泥巷陌屐聲多。翻思舊日經行處。看徧交枝萬眼羅。

首春連雨兼旬。借閱谷林新購宋槧僧智圓居編。用前韻。

緊薄無痕知宋紙。高人獲之球璧似。開械處處見西湖。瑪瑙院僧中庸子。閑泉幽徑蹟荒寒。湖波依舊繞孤山。春來懊惱連天雨。開落梅花溼翠閒。

初晴曉行湖上

一年難得是春晴。落盡梅花始出城。半白烟橫山淡冶。初黃柳照水空明。自披絮帽寒猶峭。纔上籃輿趣便生。底事不教浮艇去。尋僧又過亂泉行。

春夜訪巨公于雲林宿面壁軒

昨與林僧有夙期。明燈定板話移時。重修靈隱千年志。更續西湖八社詩。鐘學龍吟春礪響。松和猿梵夜堂知。漸看海色梅梢上。消受輕寒拜本師。明嘉靖間西湖有詩社八。曰紫雲社。曰洞霄社。曰飛來社。曰玉岑社。曰玉泰。高穎湖應冕王十岳寅劉望湖子伯方十洲九敘童南衡漢臣沈青門仕分主之。

二月三日同少穆竹田諸君集湖上題酒樓壁

湖上羣山列畫屏。探芳齊上上船亭。春光更比去年早。詩鬢不如前日青。正滿水應爭淡蕩。未開花似惜飄零。魚羹宋嫂猶遺俗。何事尊中限醉醒。

次韻董浦春日書懷四首

里社追游每拍肩。投簪又是入新年。移家幸有琴書共。卜築欣看樹石連。不守庚申緣道在。偶占甲子得春偏。始知上界多官府。今向人閒見斥仙。

六街堀堞夢纔醒。草色何妨滿戶庭。洛下憶曾修禊事。淹中悵未了遺經。當簾山月鈎簾見。傍枕春潮轉枕聽。此是城南招隱處。新詩暇日上重屏。

獨坐杉亭。族絳趺。看花折簡不煩呼。從無長物稱名士。雅有閑情屬固姑。酒畔俳諧編作集。墓堂文字積成逋。與君共喜慈顏奉。未敢人前號老夫。

端居風物際昇平。不覺吳霜點鬢生。上冢年光潛委巷。趁朝清夢入嚴城。噉齋元是儒林味。焚草無勞後世名。有約出郊真興劇。柳花如雪愛初晴。

二月十四夜同周少穆胡又乾施竹田吳敦復汪旭瞻施北亭西湖汎月共賦四絕句

滿湖雲水溼如灰。直爲桃花冒雨來。已拚尋僧寺中宿。峭寒忽見晚陰開。湖上鳴鸞盡屬官。青紅亭館亞層巒。東風也似撩詩思。柳外吹來月一丸。水靜初鎔百頃銀。游船歸盡閉重闌。莫辭蘸甲十分飲。月地花天只七人。月下看花不肯紅。沿隄花影壓孤篷。春烟夜半生波面。髣髴青山似夢中。

曉行蘇隄作二首

乍披衣起曉鴉前。月落春空柳暎船。半醉半醒行樂客。不晴不雨養花天。堯時甲子今重見。唐世清明此尚傳。偷得湖邊成信宿。向人誇道是頑仙。

破曉招尋不待呼。山烟水霧斂還無。樓頭柳眼如窺宋。隄上花枝總姓蘇。價重十千春易買。才高八斗景難摹。惠崇小有丹青手。肯爲佳游寫作圖。聖因寺大恆長老爲作春湖月汎圖。

吳山賣卜行爲許初觀作

吳山新雨道少人。石龜巷古無風塵。開簾忽與許子遇。白鬚蕭颯談齷齪。許子才筆清而醇。五經紛綸井大春。屢干春卿不得進。馬磨豈療文休貧。去年束裝爲客游。一言不合東諸侯。著書自比習鑿齒。賣卜定齊顏惡頭。我聞四千九十有六卦。孤虛飛伏分成敗。何妨俗子握粟求。自見名流攝衣拜。入戶空占銜筆蛇。夜深背癢無人爬。老夫如應枯楊象。不羨長安擇堵車。時初觀有再娶意。因以戲之。

陳居中蠻王入貢圖

開絨絹素凝烟霜。筆跡纖妙窮豪芒。七國人物在右方。嘉泰待詔蕃馬長。丹丘博士官天章。八分題識俗頗詳。顧瑛私印謹所藏。職貢一一來梯航。嬋媛四騎君袂良。非昇彌呼名女王。侍兒手捧沈水香。鑑井而孕何荒唐。持衰渡海不得望。真臘風土文豹將。蠻奴對昇乘阮囊。前道獵獵旗飛揚。占城浮泥耳垂璫。錦鬪包裹百寶箱。負箱峩峩拂狻裝。扇飾髦毳隨侍旁。臣葵髻髻獻西洋。象齒如雪闍婆鄉。三佛齊致兩驢驢。一匹頓塵一騰驤。此皆鬚髮深目眶。向化慕義恭趨躋。復有釋子偕雁行。得非奮然與頡頏。九譯之及古越裳。宋德如日出扶桑。願難任人無怠荒。畫史再拜陳明堂。

次韻答竹田雨中見寄

一春常費酒家錢。尋壑經丘到處便。閑病只憑花著莫。清愁每共雨連綿。平生自信無媒徑。世事從他上

水船。屈指故園櫻筍會。與君行樂又今年。

蘇文忠公雪浪石盆銘拓本。向見於馬君嶰谷齋中。曾和公雪浪石詩韻。今年春。曲陽孫明府以一通遠寄。復用前韻賦一篇。

奇章聚石甲乙屯。嗜好未若滎陽尊。蘇公豈與二子類。往往手剔苔花昏。定州雪浪亦何有。官齋岑寂如山村。黑質白脈獻瑰狀。彷彿國士登公門。天風吹公落南海。誰持此石爲招魂。浮休居士張舜民繼公後。力搜故物頽垣根。玉井芙蓉盡牽復。銘字爭看屋漏痕。事見墨莊漫錄我居東南夢西北。喜得墨本堪重論。機泉飄灑今已矣。想見白帝朝翻盆。故人惠我意不淺。一紙奚啻千金存。

覺範畫梅爲敬身作

古來畫梅誰最好。僧中獨數花光老。花光衣鉢付何人。石門釋子得其真。曾聞花光能畫影。墨暈寒苞偏耐冷。石門畫梅兼畫月。比校烘雲尤幻絕。只圈花瓣不安鬚。看去臃臃月如潑。畫月之外更畫烟。烟籠玉質難爲傳。斜枝一抹忽中斷。似倚孤山向晚船。流落南屏定幾時。君今幸得收藏之。寫作春風十分態。舉似湘西瘦阿師。箇是浪子無聲詩。

過張聚五齋。觀王叔明爲陶九成作南村圖。次卷中全思誠韻。

陶公至正末。養素棲田園。自號小栗里。曠然脫塵樊。文敏之外孫。畫蹟可晤言。簷端機山秀。籬下谷水源。

著書自抱甕。爲農常叩盆。修修疎竹裏。欲往造其門。

倪穉疇給諫庚申夏日在京師。曾作城東訪友圖。并系以二絕句。寄金江聲副使於上谷。蓋追寫丙申春同訪余不值事也。江聲亦題二絕句。裝潢成冊。穉疇癸亥奉使江南。歿於太和。今春江聲歸里始得見之。感歎不足。如數題後。

存歿人閒感有餘。黃門詩畫最清疎。長貧孺子今猶是。當日偏多長者車。流光勿勿去難回。訪友圖成事可哀。水竹城東無恙在。喜君頭白早歸來。

原作

杭州倪國璉子珍

枳籬門逕菜花初。最愛城東水竹居。人立板橋吟興遠。隔林何處響縑車。詩人高隱斷幽蹊。菜圃三叉路欲迷。看竹平生緣不淺。叩門隨處踏春泥。

又

金志章

桑村蘓蕩接城隈。亂竹遮門晝不開。一曲板橋烟水隔。緩尋芳草更裴回。十年卻埽謝公車。卜築城東稱隱居。知與俗人行跡斷。菜花香裏自抄書。

春盡日小園木香薔薇盛開時。子將有廣陵之行。

老逢花信頗流連。紅素春餘特放妍。一桁重陰如愛護。千枝柔蔓太狂顛。郁然舶上香山子。奇絕宮中錦

洞天明日扁舟吳苑路。晚風猶爲舞僊僊。

陸南圻招同人集行菴分詠廣陵古蹟得秋聲館。

鐵牛入宋初。陶穀小字鐵牛頭銜祇翰苑。奉使下南天。蘆碧汀洲晚。水村何人居。風葉梢梢偃。聲翻六月秋。江吞

萬里遠。榜題亦雅士。竟與漁兄混。奈何諭強藩。不盡王臣蹇。情昵社娘歌。任社娘傳見沈遼雲集編語隱公廚飯。金鑿

否人在。穀自號金鑿否人空畫葫蘆本。不如此棲遲。賓鴻識肥遯。

五月二日嶰谷半槎招同人集小玲瓏山館題五毒圖。

壁上鉤搖長尾蠶。服虔通俗文蠶長尾曰蠶守宮善緣供一噉。之二蟲者豈睚眦。以氣相制理莫解。爬沙腳手鈍不快。

蟠腹睥目觀成敗。漫上青冥作妖怪。空使臣全下階拜。其旁甘帶有卽且。蚊雖似汝齧不如。韠人須皮待

汝屠。蠶表錄異蜈蚣大者皮可鞞鼓戾蟲耽耽中央居。風林夜嘯百獸祛。乃與羣小爲相於。得非以人充餌歟。是名五毒

圖畫俱命儔。連類陰生初。疎簾高館無沮洳。象形隨俗當禳除。演雅聊爾同軒渠。

五月十四夜紅橋王氏園看月同玉井梅泮南圻作。

王家樓子不多寬。五月添衣怯晚寒。樹底明蟾樹頭雨。酒人泥殺曲闌干。

同作

江都陸鍾輝淨川

攜得清尊上小舟。滿園梅子雨初收。月斜人醉不歸去。白紵涼生水面秋。

送施葉齋之官餘姚二首 愚山先生曾孫

江城初識面。又送片帆過。漢縣圖經古。姚墟山水多。裝輕知砥節。名重異催科。好與蠻荒政。同賡里俗歌。
君前宰電白。以循吏薦。

籍甚高賢後。稱詩有典型。清新爛格調。孤峭萃英靈。行幘穿時雨。專祠拜客星。東游應踐約。準擬續蘭亭。
元至正庚子春。劉仁本集。甌越之上。四十二人。於餘姚祕園湖北。作續蘭亭會詩。

顧丈月田招同人南屏讓師房避暑分得葉字

僧房有嘉招。銷夏幽事愜。一艇溯空明。風漪平帖帖。宿雲曉未收。湖南秋已泮。入港低水花。穿林響露葉。驕陽似避人。經樓曠可躡。斷塔兀當窗。連山遠於堞。徑轉巖陰侵。堂開泉氣攝。休公苦愛客。蔬果紛稠疊。瘦傲曷可詩。澹續宗劉業。何當爲後游。更步松閒屨。

周少穆招同人流瑪瑙寺訪後僕夫泉分得無字

何計足銷暑。幽泉時所須。同詣北山寺。況有方袍俱。搖兀盪雲水。蕭瑟鳴菱蘆。入門氣象古。松徑臨平湖。芳公遺甃在。寒碧窺牆隅。當年續前哲。用敢告僕夫。雖非孤山舊。法乳應不殊。至今四百載。充滿於僧廚。日汲忘其名。流俗良可吁。主人尙敬客。一斗爲我爨。烹珠兼鍊雪。頓使渴吻蘇。惜哉張貞居。小碣今已無。凄然想清音。難覓石上枯。
芳洲琴名我亦山中人。行當斷甘腴。楊家買阿對。杜老喚療奴。此策成有日。不假調。

水符一笑且置之。相與追詩逋。

初秋雨中汎湖

湖上經旬兩度過。亂雲陡頓暗高荷。北峯半沒南峯出。日腳斜明雨腳多。豈有吳兒愁盪漿。漫從漁父聽鳴蓑。誰臨潑墨屏風樣。坐看秋風起白波。

青溪歎

七月三日天沈沈。海風吹作三日霖。黟山妖蛟最得意。夜拔潭穴漂嶽壑。水來青溪十丈許。鼓怒直使胥濤瘖。胥濤氣短退三舍。人如白蘋蔽江下。屋材家具滿江汜。嗚呼青溪之人。何辜於蒼穹。人人盡在秋夢中。不知魂游龍伯宮。

中秋日陸芸軒招同人游南屏觀米南宮摩崖琴臺字分韻

南山秋爭高。彌望翠屏展。陸子柘湖來。招尋興不淺。入林導白足。幽徑逾偃蹇。斗折攀壽藤。仄行仆積蘚。透迤穿風穴。潭壘凡幾轉。湖光似明蟾。屈曲浸蒼巘。舉俗重宵游。我輩及晝衍。側聞米漫士。題字剔蝸篆。琴臺爲誰書。健筆猶可辨。清音自有餘。佳名非枉踐。古人去已遙。得酒聊共遣。

贈茅湘客七十時寓湖上昭慶寺

秋賦同時幾輩存。茅君元是列仙昆。百年遺事鍾山獻。一卷新詩白下門。時以金陵游草見貽。中多述尊從高祖止生先生事。先生姬人

楊宛有詩集名鍾山獻壽骨自臨湖水照。閑愁不傍佛燈昏。相逢初地無塵事。應覺清言勝酒尊。

秋晚自臯亭至臨平二首

不減看山興。吾行及杪秋。斜陽半郭外。晴翠滿船頭。林晚開黃葉。波明見白鷗。前峯烟際寺。歷歷記曾游。
將近臨平道。臨平暝色連。遠風燈照牽。去聲微月蘄鳴船。山憶丘丹隱。泉題玉局仙。不知松子落。誰詠夜涼天。

過硤石登西山廣福院三首

魚麈菱市鬧秋深。山似蛾眉俯碧潯。我是杭民重遺愛。舍人行處一登臨。西山曰紫微。以白公登此故名。公嘗云。杭民呼余爲白舍人。
千畦穰稔望中收。海日初生爽氣浮。二十六年彈指過。白頭纔得倚僧樓。
顧逋翁有讀書臺。白塔青林相對開。佳處不教容易盡。東山留待後游來。

月夜渡石湖

斗柄倒插吳江濱。三萬頃外秋無垠。楞伽山影混空碧。胥口月光流水銀。十幅帆從天上渡。一星火識蘆中人。世閒嚶夢那得到。寒塘露下添衣頻。

朱澤州鹿田招同人游寶奎寺分韻

寺爲宋相喬行簡捨宅。有理宗摩崖見滄二字。

招攜惜短晷。吟興近山發。斜照巷中巷。深感幽人歿。昔吳文志上每入城。必寓此寺。有句云。幽人深住巷中巷。好鳥遠歸山外山。茲來盛朋游。

登高見城闕。鱗鱗遠峯際。江影露一髮。見滄閣不存。崖石尙突兀。閑尋穆陵書。黃葉徑凹凸。僧龕文惠像。練達具風骨。衷中秉魚須。便殿曾備忽。如聞三京收。深論八陵謁。樹國先治內。陛下莫倉卒。胡爲復讎舉。竟使南渡蹶。無兒似香山。捨宅作禪窟。斯人真曠懷。華屋已銷歇。裴回久言旋。霜空摩健鶻。

新安吳長公與予有卜鄰之約。將以明春攜家武林。索贈四首。用舊韻。

一區河曲地還餘。同巷初欣有定居。自比晏嬰知近市。非關王播羨臨渠。名泉秀嶂兼幽躅。時長公寓落家錫山

葉高窗似故廬。爲說西湖好烟景。長竿移得昉溪漁。

豪華不慕柘枝顛。脫卻朝衫便是仙。求友寒尋烟外驛。攜家春上渡頭船。擬刪碧草通新徑。待構高齋署小眠。我亦年來愛幽隱。買山未辨道林錢。

入春風色最天斜。摒擋琴書頗足誇。帶蘚旋移天竺石。和泥須買馬塍花。每聽通德閑中話。相伴清娛到處家。只此淨名方丈室。翛然已遠輓塵譁。

殘年猶遣報章聞。酒國詩壇卽舊勳。水竹遮村無萬數。雞豚結社再三云。菟羅更續城東記。予舊有城東雜記三卷

討論應添硯北羣。他日灌園徵軼事。雨苗烟甲幾家分。

除夕雪中讀唐撫言四首

白衣濫竄惜温岐。五十成名未是遲。何事少師戎幕客。居然兩箇阿孩兒。

貴人莫怪事多忘。索婦留官也不妨。記得泠然書內語。賣漿今又值天涼。
裴頭黃尾姓名殊。招悵長風過宋都。寄語詞人休自許。花鈿曾及半妝無。
年年今夕倍情親。喫果看書翦燭頻。一事差贏隨計者。雪中不作鬻驢人。

樊榭山房續集卷第五

詩戊

正月四日雪霽遊天竺寺歸訪巨公於靈隱寺出觀宋天聖四年免賜田稅牒至晡並湖而還得

詩三首以下乙丑

大雪回春姿。奇寒故宿留。駕言遵湖潒。參差縞衆皴。初陽一照曜。飛光滿崑岫。松門限西南。咽咽幽瀾漱。禪棲冰雪懸。卵塔竹陰覆。窅然泯垢淨。瑩若增深秀。焚香禮普門。合沓羣峯湊。眼中銀色界。可覲不可究。林巒削玉轉。兩礪束一橋。此中雪逾深。午景停虛繆。飢鳥啄凍石。迴颺撼封條。泉影鑒更白。崖溜垂未消。自非能寒人。難逐猿父跳。主僧方外契。茶話相招要。示我免稅牒。重是全盛朝。何如署曰貞。押字集羣僚。
牒有王曾薛奎陳堯佐呂夷簡押字蹟存人已往。不異空花飄。遲遲出山路。覓酒同歸樵。

山村九里行。融互趾交錯。松閒見積霏。皎然若棲鶴。湖平碧流淨。延眺清廓廓。回首所歷境。冷色晦烟壑。斜日半南山。璀璨數樓閣。近城氣猶凝。向晚風大作。微吟平肩輿。尙恨衣裘薄。

元夕吳敦復招同人集瓶花齋分韻

寒氣猶遲屋角梅。快晴似此亦佳哉。童心忽覺燈前在。客興多從月下來。舊雨沈沈思剪韭。憶去年元夕雨中之集

新詩藹藹續傳杯。看街簾外天如水。歸去誰家笑語催。

汪西顯招集湖舫分賦

此日春寒撲面濃。柳絲猶未試丰茸。鷗鳧不動假前浦。烟雪相和畫數峯。久別詩成新雅集。乍來船問舊游蹤。郭家車子斜陽外。似惜芳菲特地逢。

河渚探梅同南漪旭瞻蒔庭笠人作五首

千斤池

遙指秦亭翠。舟輕縱所如。風流非踏土。浩蕩想觀魚。芳草生遺廟。寒梅笑廢墟。侯芭能載酒。幽興未全疎。

宿蘆菴

投止蘆中宿。前山澹夕陰。春風花渚響。夜火佛堂深。飢獺窺禪定。驚鳥助客吟。何人偏早起。牀下有挈音。

同作

仁和許松蔭庭

舟到交蘆舍。春禽送夕陽。青山當佛座。流水繞禪房。籬外叢篁密。庭前綠萼蒼。夜來風過處。幽夢帶寒香。

曉過曲水菴

水北與花南。精廬近可探。漁舟出清旭。鄰磬接空潭。壞榜猶存字。晴山漸有嵐。簷梅亞紅雪。幸得供瞿曇。

同作

許松

鳥噪披衣起。幽期次第尋。低頭穿竹徑。清話叩香林。梅古簷前亞。山明屋角侵。開扉尤可羨。曲水滌塵心。

同作

歙縣汪還仁笠人

侵晨尋梵放。隔竹啓僧扉。岸曲溪痕見。林疎山氣微。茶香來坐具。梅影上行衣。漫作重遊計。高閑不擬歸。

秋雪菴贈與耆上人

老僧年八十。自小住汀洲。與客談秋水。開窗照白頭。五年花事改。四壁蘚痕留。太息南湖廢。空門亦隱憂。

同作

歙縣汪日煥旭瞻

偶繫春風艇。難尋秋雪詩。千峯遙供養。一衲古鬚眉。野竹遮橫釣。疎花出短籬。客來閑指點。空闊鷺飛時。

月夜汎舟至西溪山莊

溪流凡幾曲。曲曲月隨船。別浦春寒淺。名園夜色偏。鳥驚千樹雪。人語數峯烟。不待參橫後。臨行一惘然。

西湖采蓴曲

湖波春深碧於苔。游魚布影三潭隈。三潭倒浸三塔小。中有蓴根不用栽。蓴根歷亂蓴絲滑。半捲玄荷縈石髮。曉光蕩漾膩山烟。夜色微茫霄水月。大姑采采瓜皮舟。小姑盪槳歌中流。指纖爲怕龍涎失。腕弱尤憐雉尾柔。春風采蓴蓴正好。秋風采蓴蓴已老。願如蓴好繫郎思。歸來同拜水仙祠。

三月六日顧丈月田招同人鳳皇山看桃花至包家山分韻二首

乳鳳不飛去。日斜林翠高。山行誇勃率。野飲鬪清豪。社火明神樹。宮花冷佛袍。今年少風雨。春事屬吾曹。三一菴重過。江天望最佳。竹疎搖客夢。泉冷入幽懷。紅雨尋歸路。青山著小齋。他年團社約。應不負吳鞵。

錢舜舉摹周昉內人雙陸圖爲梁諶林作

深宮晏起花陰午。尙覺春寒入眉嫵。只將握槩當嬉游。不亂窗前白鸚鵡。兩人對局如有思。寶釵半墮雲鬢敲。旁觀一人凭小婢。骰子欲下春蔥遲。蠻鞞踏地紅鴿鶩。金餅力挽薔薇水。女官未敢促朝妝。宿粉殘黃憶濃睡。睡濃曾夢雙陸輸。唐家社稷須人扶。柘袍又出點籌手。樂事可憐同婦姑。畫師著眼非窮相。曲眉豐頰當時尙。錢郎摹古能逼真。寫出徒令意悵悵。豈知絕代佳人住茅屋。寒機軋軋無膏沐。

晚春閑居二首

人閑如有待。春晚尙餘芳。細路通鄰塹。長天覆女牆。青梅閒青杏。垂柳復垂楊。坐釣行吟外。渾疑與世忘。寂寂柴荆掩。幽偏似我私。抱疴忻白髮。習嬾負清時。迸筍從穿砌。狂花漫出籬。一春書不讀。園小日來窺。

舟泊毘陵同吳長公游青山莊四首

入門先見水。宛似在濠梁。林影橫烟艇。流文照畫廊。清華從此始。崩剝勢難忘。客路偏佳境。尤宜勝侶將。縱步平橋上。空涼得最多。俯窺開弱藻。交語出喬柯。尙記橫塘夢。如聞子夜歌。何當逢急雨。來看甍新荷。升降疑無極。岡巒望更寬。頽陽一枝塔。飛翠幾層闌。樹杪吳天盡。窗中春事殘。米囊花滿眼。應是勸加餐。前朝邱壑擅。人說兩愚公。錫山鄒彥吉爲闌名愚公谷。此莊初主吳服干亦號愚公。物力爲山盡。經營易主同。客歸書閣閉。鳥下石枰空。游興兼離緒。分襟向晚風。

次韻同作

歙縣吳震生長公

毘陵共游眺。遺事滿齊梁。只少山環郭。誰家樹繞廊。愛他園內景。令我意難忘。榜戶招詩侶。杯鐺且莫將。主人榜門有詩酒可共語。

神仙疑有宅。富貴得爲多。碧水延長阜。紅樓隱古柯。金張天上族。弦管月中歌。行樂宜邱壑。朝衣早翦荷。

昔者東牀重。延陵俛仰寬。烟雲邀對酒。花月入憑闌。紫玉空留主。香魂悅未殘。若知人代感。冷食亦愁餐。莊故主吳氏宜興相婦翁也。吳又有季女死于此時形見雖壓易姓皆祠其木主云。

勝境遭鴻筆。千秋幾鉅公。不隨陵谷變。莫謂雪泥同。塏廟涼陰集。亭橋夕照空。菟裘那得此。惆悵一臨

風

海烈婦祠迎送神曲二首

撫湘瑟。薦江灘。靈望夫。其來遲。夫愚弱。疑可餌。矢從夫。靡有貳。夫來遲。逢猶狂。緝上服。連下裳。繫朱絲。猶在領。號于帝。已得請。乘白鳳。游清都。下鑿觀。芬椒塗。靈安坐。士女愉。

酌明水。靈少留。靈懷土。我心憂。逐雲龍。無處所。懸水村。靈迺下。乘桂舟。西蠡河。靈不留。涕滂沱。

葉物齋雅集賦一字至七字詩分得禪

禪無住。忘筌。隨靜坐。得安眠。不離文字。已滿中邊。話墮霑泥絮。心空透水蓮。世出世間超絕想。非想處悠。然。何須更乞雲山衲。釧動花飛結淨緣。

馬嶰谷半槎招集行菴食筍限筍字

我生吳越鄉。連山富籊籊。前身天目僧。托命惟在筍。宋僧贊寧筍譜載天目僧詩云。我本無根株。只將筍爲命。每從破凍初。一洗几案。窮胸中。凌雲氣。欲吐謝不敏。孤帆卸淮甸。清樾表春盡。故人有嘉約。斜徑竹香引。軒窗愛疎豁。新境拓畦畛。供客用意勤。籊龍屠最忍。頗疑匡廬游。甜苦未可哂。物以少爲貴。食經侈堪憫。捫腹又詩成。茶聲鼎鳴。蚓。

覓句廊晚步二首

近日幽尋屢出郊。竭來山館燕新巢。斜陽一抹風廊影。葵寫圓花竹寫梢。
返照深深入竹根。青鞋踏徧舊苔痕。好詩只在微茫裏。付與棲禽自在喧。

程泚江編修招集篠園水亭分韻

虛亭俯烟渚。客到眼初明。沙柳侵天影。風蒲學水聲。醉宜搖櫂去。詩向倚闌成。地主饒幽興。流連待月生。
題嶰谷半槎南莊七首

青畚書屋

平遠眺林垌。肥仁繞江水。人云讀書聲。時出豆田裏。

卸帆樓

空樓晴亦雨。桐竹風披薄。飛來北固雲。帆影窗中落。

庚辛檻

水氣入虛檻。幽澹心自領。魚行無所依。旁穿高柳影。

春江梅信

我來過花時。紙閣綠陰碎。驚鳥蹴梅丸。忽墮小山背。

君子林

彷彿西溪路。風吹綠玉香。入林深似許。新粉滿衣裳。

小桐廬

零露響閑砌。涼陰翳微霄。我欲揖桐君。獨唱懷仙謠。

鷗灘

小構傍雲沙。岷流通滌渺。待君秋雨餘。同盟三品鳥。

宣德窯青花脂粉箱歌。次毛西河太史韻。爲汪伯子作。

我聞列仙寶玩碧瑤箱。惟有旌人祕色可比方。絕無髻墜但精瑩。花壺茗瓊猶家常。前朝妝具今尙在。函藏帖妥櫓兩旁。方池圓窻各位置。泄寶似挹華清湯。春風慣見閉上苑。曉月每看低繚牆。曉月春風等閑擲。芳姿誰侍君王側。鉛華狼藉秣陵秋。脂流縈漲秦川色。幾爲傾城失家弄。黃金不惜蛾眉用。太平天子說宣皇。求賢時發肯靡夢。三楊枋國老能堪。聲教曾聞暨朔南。萬幾多暇偶燕息。尙宮司飾呼當直。小杈芙蓉十隊紅。亦有朝鮮女侍中。御筆描來摺疊扇。熏爐賜與合歡銅。廣寒殿影玲瓏樹。晨興須奉宸游去。回眸笑語並房人。舊是蕭娘梳掃處。卷簾對鏡復開箱。酥滴檀心自研注。傅成豔雪和丹霞。暎就飛花黏落絮。青瓷可愛還可親。饒州燒出真超倫。依稀玉鳳親承寵。彷彿金匱乍作嬪。明明逝水恩叵測。眉萼連娟吹不拆。畫堂涿館得啣啞。椒寢長門翻咫尺。咫尺梧桐墜井榦。洗妝只著羽衣寒。宮中決絕皆如此。故

物何人想象閒。慢學龍眠圖古器。吳趨李子工爲記。向爲姜學在物。李子客山有記。前姜後汪相乘除。嗜好如以蚓投魚。毛公長歌劇哀麗。我欲繼和應嗟歎。黃巾蠶起坤靈覆。掠盡昭陽慨陵谷。尋常兒女豈能銷。合贈輕盈助朝沐。底處重將脂粉調。吳王苑內買姪媼。只今細看交枝樣。壓倒官哥汝定窰。

題汪貞女卷

賢雄未匹鳳先祖。侍疾初歸矢莫渝。五日爲期同穴定。十年不字畢生孤。何妨筭菜稱來婦。自信釵荆勝丈夫。佇看旌門輝里巷。冬青花影雪紛敷。

夏日巨公以白沙泉龍井雨前茶爲貺賦詩以謝

悠悠林臥晝偏長。畏暑都無卻暑方。老去參軍多吻渴。渴來禪伯與心涼。泉分曉甌和雲送。茗裹春旗待月嘗。今日因師聊破戒。松風手瀉一甌湯。子近不飲茶。故云。

碧山草堂椽筆歌

古來何人能大書。官奴俊爽力有餘。淋漓只用埽泥帚。埽出不怕春霑淤。化城額傳裴相休。以袖搵墨蛟龍遒。何如汪家碧山草堂裏。酒酣脫帽看尖頭。睡菴老人氣倜儻。青管高提盈一丈。至今森然挂東壁。故物不與人俱往。藤韜漆護縷絲牢。中山徒秃千兔毫。想見盤旋跳盪發絕叫。驚電破硯翻雲濤。長槍大劍莫相笑。毛錐如此亦足豪。君不見天竺紅牆似霞起。發地扶椽看五字。天竺寺牆觀自在菩薩五大字。睡菴書。猶存手澤供

摩挲後代良孫解驅使。後代良孫解驅使。翻身使臂不使指。何當直上天柱峯千尺。一波一磔當空擲。山
魁木客皆辟易。

初秋同旭瞻蒔庭有蘭游西山作四首

坐韜光飛雨軒作

一雨暑解嚴。始踐西山約。初日翳復吐。秋氣滿崑壑。興來歷礪阿。薜磴宛如昨。入門翠陰積。翻覺涼雲薄。
石龍臥空池。泉根此焉託。坐聽丁東音。終古娛寂寞。領珠不自惜。天樂然疑作。禪老洗聲塵。爲客幽茗淪。

同作

許松

撰杖入淨域。塵垢無纖毫。竹陰翳殘暑。佛香遠煩囂。石龍噴泠泠。中蓄萬斛濤。乍聽疑秋雷。久聆訝春
槽。邂逅逢勝侶。款言興更豪。濯纓可終老。媿未解天弢。

入龍泓洞中有小穴僧云是昔人采鍾乳處今不可進事出劉道真錢唐記

微颺貫崑腹。生衣凜不勝。短策探龍窟。呀然走怪藤。剗中夢天壓。捫壁疑雲崩。盡處涌佛座。指點來殘僧。
陰竇不可測。鼉行誰復能。彷彿千載前。言采鵝管冰。度險入九地。江底穿幾層。擗聲在頭上。隔石喚欲騰。
此事道真記。祕籍如足憑。奇添好事癖。冷結耽詩癡。九達彌似隘。跬步愁難仍。不比游大滌。飛鼠侵明燈。

春淙亭遇雨

山行非捷徑。因雨亦窘步。前峯日尙明。飛灑空欄樹。同心二三子。復茲不期遇。謂開石橋亭憩華構。目盡崑洞趣。苔滴佛螺秋。雲歸客衣暮。淙潺石上水。導我尋微路。

夜宿松靄山房

閑房駛雨過。林杪挂星漢。涼深欲添衣。不但殘暑道。蔬盂供細食。花巾奉清盥。相偕靜者流。共待疏鐘斷。夜闌空山黑。月吐翠微半。澄輝漾庭戶。秋影互凌亂。露蟲鳴始急。坐覺歲時換。人生非學佛。詎免遲暮歎。感此不能眠。裴回以申旦。

秋日同少穆竹田敦復過報國院

釋子禪棲處。城隅一徑分。風池時動樹。秋宇欲銷雲。施食游魚出。吟詩野鳥聞。何年談小品。結社共諸君。

題朱丈鹿田蘇門灌畦圖

人生穹壤間。棲止無定境。宦學便擇居。何必戀閭井。往者歐陽公。終日苦思穎。況茲百門泉。名與淇水永。太行從東來。出沒幾峯嶺。清泠滿山腹。匯作跳珠猛。分流入綺塍。不待汲修綆。所以樂土游。仲平有深幸。許魯齋詩。我來蘇門居。遊遊成樂土。先生詩家流。出守厭造請。三公付孫劉。一官罷張邴。偶然泉上行。光景愛妍靚。遂買泉上田。犁評手自秉。暇卽挈茗杯。樂在汎舴艋。何如西子湖。明鏡涵藻荇。今年故鄉歸。菟裘嘿焉憬。生平釣游侶。詎忍棄如梗。寄公付佳兒。耆舊得自領。畫手想像爲。蒼翠善寫影。夢繞嘯臺烟。秋燈照耿耿。

八月一日讓山上人招集南屏山樓看雨分韻

俯視僧樓但雲氣。滿林飛雨攪秋懷。平沈遠岫墨初潑。淨洗明湖鏡乍揩。涼向松窗分白納。溼愁蘿徑阻青鞵。黃妃塔畔空濛裏。記取炊香共午齋。

采菱詞二首

青山影裏遠聞歌。冒蔓牽絲滿鏡多。儂比菱花偏背日。郎如菱葉慣隨波。
鮮於蓮子冷鴻頭。船尾炊來趁晚秋。一百里中香不斷。直從鳳口下湖州。

秋陰集汪抱樸城北水房分韻

一片荒雲乍有無。此閒亭館壓菰蒲。淡如人意不可畫。涼到句邊渾欲逋。老柳沿隄烟影重。殘荷覆沼墨痕枯。爲憑橫玉吹教裂。明日西風渡鏡湖。時子將越游

題北嶺將軍廟二首并序

廟在蕭山北幹山上。按施宿會稽志云。武佑廟舊號北嶺將軍廟。方臘陷錢唐。欲東犯會稽。見將軍擐金甲。陳兵於西興。旗有北嶺字。賊不敢渡。郡守劉韜上其事。賜今額。陶宗儀輟耕錄云。至正丙申大旱。方士陳希微禱雨于北嶺將軍廟。俄降筆云。吾秦人厲狄也。與項羽起事山陰。功不竟而死。父老不忘我者。俾血食於此。爾來幾千五百年。世代雲變。遂湮我姓名。故以相告。二書所述如此。予以乾隆乙丑秋八月。同

新安吳長公同里丁敬身爲越中之游過謁廟下見壁上有劉伯溫廟記不載神姓名事蹟問之居民俱云厲將軍也陶南村之言似信而有徵作詩以記其實云

北山棟宇自秦餘仗劍英姿尙凜如逐鹿似聞遺恨事止麟應有補亡書靈旗往往驚樵牧社酒年年福里閭三戶到頭仍一蹶英雄無命足欷歔

摩挲古碣郁離文未著當年汗馬勳松響忽吹空際語山光乍卷陣前雲不須白石題神號解使青溪靖寇氛歸路班荆逢野老至今猶說厲將軍

舟過覺苑寺在蕭山城中齊江淹宅捨爲寺門有夢筆橋

越游無他營合志事幽討初程歷蕭然環堞碧秋草江郎有故居斜日市渠抱維舟試來尋鴉鵲鬧浩浩牆隅石幢一相對雜傭媪依稀辨垂拱阿武時所造入門兩甌塔經始已無考猶資象教力鬼手拄傾倒睿達與溫夫署橈尙完好敕覺苑寺扁治平四年沈遼書三門江寺扁張卽之書捫壁讀殘碑元明奚足道獨有夢筆橋記者吳中老重建夢筆橋記天聖四年葉清臣撰文最工似懼地主嘲其文特摛藻中述會昌年花宮跡如掃僧徒盡烏巾雁齒廢行潦宣宗卽牽復未琢白石皓茂宰曰李君成梁十月早我媿詞囿荒吉夢敢私禱華髮謝貂蟬消搖破諸惱幾時買廛居名藍作鄰保

舟出偏門至禹陵遇雨

出郭逢秋晦。菱絲擢幾灣。幽雲生窈石。靈雨下稽山。屐染重重翠。衣沾淺淺斑。藏書猶有穴。杳靄不容攀。

雨宿臥龍山僧舍分韻

越國此山古。聽松占小樓。清鐘不散雨。破寺共吟秋。漫阻青鞵興。如添白髮愁。邪溪風日好。試上采菱舟。

雨後游叢山戒珠寺遂至怪山寶林寺

越城四面清流涵。輕舫小楫如浮驂。秋霖乍歇葉初下。發興便欲窮幽探。城中八山首采叢。君王辛苦誰能堪。橋邊不遇題扇媪。右軍彌勒偏同龕。棟撓瓦墮豆腐破。病僧霜髮垂鬢鬢。告訴頻年困水厄。物力詎足營伽藍。墨池深黝覆石穴。時見鄰叟汲滿甌。逡巡太息下山去。龜形岫轉城東南。勢若飛來尙浮動。溼雲懵懂縈楸栝。登階禮拜彥公像。屋底鰻井深潭潭。盤迴折磴苔滑汰。絕頂撲眼來烟嵐。濃青冷碧漸寒露。什十五兼參三。餘霞忽抹天盡處。倒射塔杪殷紅酣。同游相與話舊事。許掾再世梁王諳。太清以後亂旣甚。七官兄弟尋戈鏃。岳陽僅存賴黑獺。江陵叢爾古子男。稱尊踐阼崇廟祀。蠟鵝稍洗維摩慙。居然輟御聞婦鼻。都講一現仍優曼。前因不昧相輪建。波旬劫內願力擔。次律松下發書甕。樂全梁上開經函。世閒貴仕無可語。吐絲往往纏春蠶。淒然歸袂薄寒襲。明日更上林中籃。秦稽佳處難悉數。安得隨地留茅菴。

曉霽入若邪溪中逢暴漲不得至雲門而返

霽華盪輕舟。亂流爭東西。千峯碧於洗。片月林外低。今朝可憐處。真在若邪溪。溪光幾曲動。杳嶂相迎送。雲散一香爐。苔侵三石甕。不見浣紗人。了非校書夢。宛在畫中行。秋高景彌清。素湍天際下。激溜筏聞鳴。兒童竹裏看。知我泝沿情。泝沿停兩槳。樵風吹不上。富中子敬宅。松下彌陀像。落日見歸禽。閑心與之往。

次日再汎若邪溪。至平水。肩輿游雲門寺二首。

一作溪中吟。再作溪中吟。溪中有空翠。日日娛人心。伊余結勝侶。戀賞盈冲襟。峯迴近忽遠。湍減昨成今。雲松窺倒影。水竹澄幽陰。村市傍渡口。炊烟出樹深。仙源三十六。放翁云。自秦望山而北。合三十六溪水爲若邪溪。迢遞不可尋。風鳴灘瀉碧。日射潭搖金。以茲厲揭意。舟師力何任。遲回憶昔賢。高唱誰嗣音。

繫舟在楓根。石路穿畦稜。秋水溢溝塍。瀟瀟入清聽。野曠羣峯趨。藍烟自包孕。遠勢引台明。連延接嶧嶻。秦望獨孤撐。香刹倚絕勝。多生結淨業。來禮雲門磬。辨才殘塔斷。思陵鉅碑賸。松堂寂無人。幽花墜苔徑。惟有溪橋風。吹我塵夢醒。

游蘭亭

蘭渚橋邊爽氣新。騎驢石路淨纖塵。青山不改名常在。修竹翻憐迹未陳。金谷只愁無好致。選樓何必識斯人。紅牆碧澗瞻奎畫。應覺清秋勝暮春。亭有聖祖御書蘭亭序碑。

汎舟鑑湖四首

秋波渺渺碧無泥。雲樹參差望不齊。喚得烏篷新艇子。好山都在鑑湖西。

放翁宅外賀家莊。時有游船繫柳椿。莫學三山但成隻。阿儂最愛住湖雙。

湖桑埭一名湖雙。以有東南兩鑑湖也。

柳姑廟俯蓼花洲。獨處無郎俗誤愁。烟縷乍消漁市散。一峯臨鏡學梳頭。

柳姑廟向只女像。今俗誤偶以男。

露冷紅衣已卸香。鏡心何處出新妝。菱歌未斷西風起。八月涼於五月涼。

顧丈月田挽詩二首

如此湖山要主盟。纔從晚歲識先生。爲官落魄人皆笑。好客風流世盡傾。小別何堪成永訣。長留應是有詩名。一盃醉向帷堂影。傷逝悲秋無限情。

幾年吟賞得追陪。誰道風霜兩鬢催。出郭看花無一老。尋山冒雨豈重來。室中靈照悲猶小。門外羊曇懶不回。聞道彌留有佳句。可知地下乏仙才。

顧丈歿之前三日。尙作秋陰小集詩。有句云。蘆蒲水氣池塘外。只戀君家十畝園。

寄和東湖吟社鬪蟋蟀用韓孟鬪雞聯句韻

陰蟲感殺機。居壁久已待。爲物雖爭雄。於野善潛彩。冷語催緯經。天時此其殆。早多好勝徒。搜括丘壠在。尋聲復斂步。負鍤似前斲。灌穴晉陽沈。跳身齊國埜。羅致殊矜奇。籠中各清磊。粒飽腰脊強。秋深霜露改。分曹小翼輕。嬌敵前茅隄。勇逾螳孤撐。怒比鼉三倍。銳氣競磨牙。英心甘覆醢。敢云飛將驍。漫訝交綏餒。窮追始爲懼。先鳴特相給。罷鬪暑過申。來觀市逢亥。黃鬚竟大奇。黑衣將焉罪。坐令金注昏。笑看駢顏澹。

或羞見妻孥。或喜遷貨賄。人生天壤間。一粟置滄海。裸蟲惟此貴。力學戒無怠。胡爲昆蟲嬉。大事幾敗乃。昔聞玉照張。亭臺飾金綵。又聞明宣宗。奏捷勝歸凱。重之足一夔。愛如獲二隗。豪家有固然。輔導責元宰。倡和蟋蟀篇。陳義或可採。

原倡

平湖張雲錦鐵珊

秋氣感而生。養銳早相待。物性本善爭。人心藉得彩。燈下鳴偶然。牆邊攫殊殆。誰信風露中。而有王孫在。奮髯堅旣戟。鼓翅利於鐵。初焉貯冷盆。旋即更爽塏。不嫌狀微陋。先覺氣硯磊。兩雄忽相遇。一戰約難改。額廣橫金絲。齒粲掀玉隤。搏擊力無餘。衝突勢逾倍。高足善超距。弱肉將付醢。卷甲趨未甘。踰垣避先餒。種類頗稱繁。輕重詎受給。捷如刺傀政。神若椎鄙亥。將爲知己死。負亦非其罪。橫草何人功。登臺汗欲浼。所嗟好勝心。不惜購重賄。游手教搜羅。客船到瀕海。四忌犯何曾。再角興寧怠。殺氣動無端。機心暗啓乃。旌之以三花。雜之以五綵。同類反見戕。作歌奚獻凱。仰關罷攻秦。丸泥類封隗。孕此屬多事。吾欲問真宰。盧賦與賈經。雖存詎足採。

同作

平湖鮑詢咸吉

促織性喜爭。紛紛設壇待。石產質孕剛。葦化色流彩。練牙與卷鬚。一犯防三殆。語見促織經呼燈敢厭窺。聞聲早識在。鳴寒股撻金。迎陽甲張鐵。托跡近疎籬。選地得幽塏。灌以水泠泠。搜從石磊磊。牙籠舊式藏。

瓦盆新樣改。異種赤疑斑。凡品白遜醜。冷煖分後先。優劣判億倍。同類如仇讐。甘心相菹醢。置偶使不孤。善養期無餒。形含詎嫌微。色辨莫教給。計功正當秋。爲月恐近亥。想彼鬥方酣。奚啻聲其罪。髻奮勢孤撐。目注汗流浹。挑戰憑寸草。剋期博重賄。兩軍勁成敵。百夫喧沸海。俄焉雌雄分。負者神色怠。童心殊懵然。公事竟敗乃。奔逐空攢花。奢侈到翦綵。壯矣將留名。歸歟捷報凱。託命於斯蟲。如昭之尊隗。長安市上豪。半閑堂中宰。一例等兒嬉。齷齪寧足採。

同作

平湖陸銘一紆齋

萬物以類親。茲獨鬪相待。秉性殊貪殘。振羽偏光彩。雌伏肯自甘。妒生那識殆。疎燈照何頻。冷盆看早在。偶居調絲琴。獨處斂矛鏃。帥陰蓄之幽。迎陽更諸塏。高臺瞻巍巍。廣場爭磊磊。輕重等使齊。暄寒候無改。挑以庭草青。辨從窗紙矐。始角氣無前。中休勇益倍。急擊朝始食。久持夕欲醢。聲從百夫喧。色令一時餒。鹽腦伏且柔。傷股遁以給。奮如再戰陵。突似重圍亥。或勝而或負。奚功又奚罪。局內智多昏。旁觀指恆浼。來笑賈客名。遠客泊舟來。騶俗稱客蟲。去飽胥吏賄。怒臂螳當車。癡心鳥填海。林空資無留。秋老興不怠。在物已蠢然。一作爾。於人復誤乃。徒教箱餞金。浪使竿簇綵。逐逐敢憚勞。雍雍虛唱凱。策勳不殊韓。酬知信如隗。戲不止狡童。禁還仗賢宰。良士樂無荒。旨哉言足採。

九月晦日許繩武招集雪莊二首

巾子峯前好卜居。無多樹石小林廬。若添畫舫兼歌板。快雪名堂定不如。快雪堂明馮祭酒開之湖上別業也。

立冬日陸雲軒招集南屏讓公房看紅葉分韻

閑隨漁艇泊烟汀。絳葉招人此再經。十日晴光連樹醉。數峯寒影上樓青。雁來已是新霜後。僧定還同夜雨聽。最好湖心放歸櫂。斜陽有意畫南屏。

冬夜泊八赤懷施自勗

一番新寒客路中。墨雲零落水天空。故人將近似江月。小艇獨眠多野風。五畝未蒙行役力。半生微有著書功。明朝相見姑胥郭。歲晚心期訝許同。

小玲瓏山館對雪聯句

子月尚暄和。陳章丙夜忽凄斂。初爲雨脚凍。鷓突作風色。慴寒柝聲漸沈。姚世荒燈燄頻颭。撒沙響虛牖。張

積素耀危檻。被池生廉隅。章枕角冷圭琰。曙早起猶怯。鷓氣嚴出未敢。庭空亂回旋。世石怪競霜點。緣隙

冒若塵。增堆檐覆成广。禽飢背難啄。章兒戲手頻擘。眯目疑復墮。鷓失足防入坎。毀茶多嬾埽。世惜竹重

宜撼。飄警竟聯聯。增紛糅方冉冉。有客船阻歸。章相與祛再摻。遙思大江白。鷓但見同雲黯。交飛射鷺鷁。

世鉦急陣灑葭莢。玉峯迴可畫。增銀浪疊誰犯。匿影閉閑齋。章促膝探祕檢。宛然鶴延望。鷓儼爾魚聚慘。得

酒歡喜生銚世開爐噤瘁滅地主獨能賢燔羈人自多感短景憐崢嶸章長年抱頷顛斲冰待過淞鷓鼓枻
擬入剡何當問郵籤銚世陽烏放朝日煇

看山樓雪月聯句

雪初晴月復清鷓氣最屨光晶瑩章登層樓暢幽情銚世炙冰硯温酒鐺馬曰澄萬象增雙明馬曰廣寒府
白玉京鷓竹聲瀉松影橫章籟既寂思已盈銚世翦殘燭戀深更瑄曰歲云晏志合并瑄曰

行菴雅集分詠寒事得宋子京修唐書

昔賢擅文章頗亦事豪縱太守書局隨風流只小宋雪深椽燭燒起草蛾眉從主人如此稀不作舞腰供
液金黛墨語奇麗有時用區區王滹南輕議若聚訟

雪後同金江聲過直指菴尋韓平原閱古泉遺跡

委巷不知山倚山構蓮宇尋幽緝舊史定是韓王府佛閣踞池上寒藻搖翠縷有如半破月崑畔一泓吐
桃坡繚其巔歲久疑鬼斧當時勞人工用以貯歌舞四朝聞見錄載閱古堂有桃折鼎尙包羞覆車孰禦
悔文章累詞人陸放翁作姚冶惑遠祖予家族譜載明州御幹子飛公家饒于財號厲牛州同來近殘臘
誰作雲岫主融雪添波痕半瓢爲酌取詎聞丞相噴荒涼真閱古

除夕同江聲壽門菴蒲甌亭諸君登吳山飲酒樓分韻

危闌徙倚靜無譁。共惜流年赴壑蛇。山轉晴光餘半壁。渠添雪水貫千家。牽連酒伴生吟思。枵觸風情上鬢華。只有故園今夕好。翩翩目極後棲鴉。

正月三日同敦復旭瞻汎湖至聖因寺訪恆公不值

以下丙寅

開歲無事相與娛。尋僧幸有三人俱。笑披風帽上野艇。靜聽柔櫓衝烟湖。經聲出院自斷續。山影隔林時有無。筇枝定入天竺去。想見颺鶴同清癯。

送桑崱甫獨爲天台雁蕩之游

桑君江海人意氣頗超忽。早摘銀案髻歸來臥松月。開年雪載塗山情生勃勃。蠟屐告我行。健似橫空鶴。前身打包僧。游跡記髣髴。自言昏嫁了。詎使塵土汨。先爲豐十訪。次作矩羅謁。攜影當朋儔。扶杖卽隸卒。拜號獨往生。斯語庶非伐。獨汎單鷗隨。獨憩孤樹歇。獨宿寒凌兢。獨行翠窳窄。獨吟崑答響。獨沐風晞髮。獨眺俯鶴巢。獨飲侵龍窟。天台峙東南。奇秀甲於越。客兒失雁蕩。晚出名馳突。我有中宵夢。往往淩崑吼。輸君濟勝具。先我給雙轡。事不婦子謀。興爲嵐霞發。埃君銜袖詩。千載期毋沒。

立春日雨中趙誠夫松江歸過訪

市橋昨夜駐吟篷。春入幽人杖履中。白髮增年非我獨。閑園聽雨喜君同。詩編歇浦經時客。燈憶沙河舊日風。剩有南華梅信近。借書貰酒鎮過從。

南華君家堂名

同竹田大恆讓山二上人由九里松入西山坐冷泉亭作

久隔山中游。妙友欣所從。行行背湖色。深入春烟重。方袍二釋子。邂逅道氣濃。平橋得小憩。目盡西南峯。秀色紛然來。相與媚雲松。中有不朽語。挹之復無蹤。賈長江詩人有不朽語得之烟山卷透迤歷翠壑。晴多斷幽淙。亭影漾清泚。寒碧鑑心胸。疎梅爲我花。芳草正丰茸。徘徊拍闌干。喚起湖底龍。

白雲山房看梅

不知花好處。直作白雲看。磬在香中度。山從枝上寒。主人來亦少。客子到應難。只爲題詩計。東風莫易殘。

花朝河干草堂小集分韻

中春花信冷難齊。吟客須教取次題。故國雲山遲社燕。草堂風雨誤朝雞。河邊吹水添杯滿。樓上凭闌放艇低。頭白周郎苦相憶。避人今夜宿湖西。時少穆以七十生日避跡湖上不至

雨中許蒔庭春嵩招同誠夫笠人汎舟北郭看花二首

試問花餘幾。舟游貴及時。風輕搖燕尾。雨細溼鵝兒。紅素霏霏暗。林垌漠漠吹。一峯青乍破。乞取晚晴宜。村轉疑無路。平生數問津。花閒上塘水。雲裏臯亭神。俗古知栽植。人閑卽隱淪。多君好兄弟。刻意此憐春。

王象之輿地碑目杭州有牛僧孺臯亭神祠記

同作

汪還仁

皇亭春事勝。酒舫閱游踪。花渚隨風轉。雲山帶雨濃。魚爭落英去。人向暮烟逢。何必仙源裏。纔稱物外蹤。

同作

許松

緬想桃源境。皇亭彷彿同。招朋尋曲渚。蕩槳入芳叢。雨過山如黛。花多水盡紅。迷津何處問。雞唱綠蘿中。

閏三月三日。同人集湖上。續修禊。效蘭亭詩體二首。

平湖重陰。烟水相借。眷茲餘月。饒春迎夏。溯沿勝事。莫不代謝。凡我苔岑。讌娛清暇。

羣公悅衿契。布席臨芳流。夜雨被衆綠。雲與山沈浮。重三復重月。一唱還一酬。漫言繼蘭渚。興到非外求。

初夏汎舟至孤山

弄晴小雨落餘飛。水外西峯未夕暉。滿地綠陰春去後。幽禽猶道不如歸。

晚出東新關同葦浦甌亭作

背郭乍過雨。晚涼衣上侵。聊爲汀畔飯。共作烟中吟。燈影橫橋柵。人聲出樹陰。相攜多舊侶。幽賞得初心。

題清溪寓樓

四月臨溪水。清流直貫城。千家翠綃舞。列岫黛眉橫。日落收漁市。宵分過擲聲。樓高聞白苧。何事不勝情。

謁餘不亭侯廟辭

餘不水兮鄰鄰。涵芳茁兮白蘋。侯之封兮水濱。廟食此兮爲明神。龜左顧兮何之。繫侯德兮民思。民思兮寓象。車兩轡兮船兩旗。侯山下兮欲旋。風出廟兮冷然。巫歌兮雩舞。隨侯來兮靈雨。

游慈相寺半月泉

秀岑敷青蓮。鬱然抱精廬。出郭路匪遙。短策破睡餘。僧廚已過午。寂寥冷鐘魚。蒼髯韻天風。渺若太古初。亭空試一窺。泉影蝕蟾蜍。掬之冷沁齒。碧華溢方諸。暎地佇開明。在山妙涵虛。緬彼南瀾翁。早負冰清譽。館甥得東萊。於此讀羣書。飲水尋孔顏。真樂恆晏如。古人不可見。落日歸鳥疎。

登吳羌山謁織簾先生祠

言尋吳羌山。孤峯拔雲起。齊書名吳差。定復傳譌耳。井邑俯鱗鱗。石路躡齒齒。下有織簾居。清風被閭里。先生值衰季。攘敝中所鄙。老惟守遺經。歿但釅寒水。荒祠傍社公。惜哉塵滿几。茂宰初下車。行將樹逸軌。謂施明府築堂增高明。懷賢式浮靡。我爲歌神弦。再拜執筆埃。

自乾元寺至金蓮磯

吾亭望南山。窈窕穿翠麓。洗心有風潭。空影覆羣木。年深寺亦殘。飛鼠棲佛屋。誰彈幽磎泉。泠泠聲滿谷。施壁齋明府。招集德清縣齋。

寂寂重門掩。幽禽見出迎。蠶忙少公事。吏散得吟情。烟樹搖書碧。溪風入酒清。猶思臨宛水。釣艇夕陽明。
曉行臯亭道中

牽埭披衣有底忙。水烟籠日共蒼涼。客行十里又五里。舟過下塘還上塘。驅犢岸高青嶂近。護蠶門靜綠陰長。平生未了山游債。處處唯聞佛土香。

亡友吳繡谷墓下作

赤岸停孤艇。青山對殯宮。平生腹痛語。今日淚痕中。子守書無失。謂甌亭人嗟命不融。凌雲埋可得。地下傲

三公。

坐安隱寺泉上

亭亭石蓮幢。千載標覺路。秧田鋪僧衣。松蓋引客步。寺門幽且深。泓泉蓄復注。林光射池影。下見金碧聚。疑有神物潛。山鳥不敢汗。我來鬪茶坐。蠲熱欣所遇。想見六月中。行人屢回顧。

留題廣巖寺次鮮于伯機韻

臨平山畔訪仁祠。我亦經過首夏時。林下追從惟野衲。門前來往但舟師。護伽藍失河南像。伯機又有絕句云。禱河南伽藍是護窳堵波空元覽碑。唐元覽法師碑已不存祇有僧房青竹好。寥寥懷古一題詩。

景星觀尋唐丘員外丹故居并序

子嘗讀韋蘇州丘員外丹還臨平山居詩。又觀咸淳臨安志。知員外仙去。至今山有黃犢嶺。以嘗騎黃犢得名。有曲竹爲員外遺杖所化。又考陳郁話腴云。行都城北五十四里。臨平湖岸有山。山有景星觀。觀有丘真人祠。祠有丹爐。丘本唐人。仕嘗爲郎。棄官學道。於此飛昇。顧況訪之詩云。五月五日日亭午。獨自騎驢入山塢。來到君家不見君。下驢倚仗叩君戶。驚起山童開竹扉。黃犬搖尾銜人衣。試問先生往何處。云入山中采紫薇。平明一去今未歸。引我池中看釣磯。池中數箇白鷗兒。見人慣後癡不飛。待君歸來君未歸。卻復騎驢下翠微。此詩況集不載。久思訪其遺跡。今年四月三日。因安隱僧心月之導。始得至所謂景星觀者。殿祠東岳仁聖帝像。前有杉柏二株。奇古近千年物。問丹爐及真人祠所在。道士懵然不知。獨門外有池。水色渟碧。上架小石橋。疑卽況詩池中看釣磯處也。裴回太息。爲長詩以紀事。庶幾有復其祠者。詩人成仙古寥寥。丘員外今不可招。斜陽照影入深塢。參差碧殿凌丹霄。殿前何有有杉柏。千年誰見蒼顏凋。我疑勁直經手種。遇逃劫火遺山樵。丹井填湮丹竈廢。光景無復浮雲歛。黃冠揖客老且眊。問之。不辨空頭搖。只崇岱帝懾愚俗。鬼炊虎獄何紛囂。裴回門外覓行跡。紫屏風動空池漂。鷗兒飛去不知處。逋翁當日過此橋。高詞貞行已足祀。遐舉況是隨烟飄。章蘇州贈丘員外詩高詞棄浮靡貞行表鄉閭何人好事塑遺像。酌以明水歌雲謠。歸來故鄉莫惆悵。自跨黃犢凌單椒。山中秋冷桂花發。往往弄月仍吹蕭。

阿姨師居近鼎湖。翹造傳自陳黃奴。向聞賜金出宮掖。千年興廢誰枝梧。頽垣古殿尙宏敞。暗篔分流水。聲響幽花閒竹隱。禪房忍草沿階叩方丈。前朝淨侶多上流。早脫愛網辭妝樓。明眸不教二相墮。幻質能將八敬修。百年主席凡幾輩。老宿無存少酬對。誰人肯透末山機。何處重尋隱峯妹。今來儉薄檀施衰。粥魚寥落誦經遲。笑他洛陽急作髻。不見文殊淺畫眉。殘碑字剝苔痕綠。寺有明天順年中胡濛碑對此彌傷人代速。枝頭批頰盡情啼。聲聲似奏無生曲。

題驃騎將軍廟

祀楚申公包胥封號莫詳所自

楚事蒼茫直至今。何年此地出神林。誥亡始遂平吳志。員在難酬入郢心。古屋香雲晴鬢鬢。虛廊風馬畫愔愔。賜旛綠錦休重問。木彪山夔不敢侵。元俞琰題廟詩呼童出示綠錦旛云是前朝敕賜物

雨泊桐扣二首

晚際開襟共看泉。山頭雲起野風顛。白龍潭上飛來雨。引我菰蒲夜泊船。三更雨歇冷于秋。翦燭題詩劇未休。四面亂蛙聲裏坐。不知元在古杭州。

